

محمد عناني

السجين والسجان

ومسرحيات أخرى



الهيئة المصرية العامة للكتاب
١٩٩٤

الطبعة الثانية ١٩٩٤

● أربع مسرحيات
من فصل واحد

- السجين والسجان مأساة
- الصديقان مأساة
- البحيرة ملهه
- الصديقان ملهه

إهداء الطبعة الأولى (١٩٨٠)

إلى جيلنا من شباب منتصف العمر
الذي يعمل جاهدا حتى يعود للفن شبابا
ويتوجه في الشباب منه

السجين والسجان

● **المنظر :** غرفة واسعة تشبه الصالون فى منزل أحد أبناء الطبقة المتوسطة فى القاهرة. يوجد بها شبك صغير فى أقصى اليسار - أما الخلف فهو عبارة عن حائط أبيض شفاف يمكن إذا أظلم المسرح أن يفصح عن مشهد للقاهرة كلها - البيوت والعمارات العالية وبعض المآذن وأبراج الكنائس - إلى أقصى اليمين باب ضخم على هيئة عقد من عقود القرون الوسطى - الأثاث قليل : كرسي وأريكة ومكتب وسرير يمكن إضافة قطع أخرى.

● **الزمن :** الحاضر

● **الأشخاص :** السجين - كمال عبد المؤمن ٤٠ سنة .

السجان - كمال عبد المهيم ٤٠ سنة .

عندما تفتح الستار يكون المسرح خاليا ثم تسمع قرقرة سلاسل ومفاتيح وضجيج شديد - يفتح الباب ويدخل السجناء حاملا طبقا مغطى فى يده . رجل نحيل ذو شارب كث - يسير فى خطوات منتظمة ويضحك أو يحزن بعصبية وفجأة - يرتدى بزة ضابط ولكنه يخلع الجاكيت ويمسكها فى يده فلا نستطيع أن نرى رتبته. بعد قليل يخلع القبعة العسكرية ويضعها على المكتب أيضا) .

يدور السجناء بعينيه فى المكان متفحصا - يبدو عليه القلق - يتجول على المسرح - ثم يبدو عليه الاستسلام - يتسم حديثه مثل التعبير على وجهه بالتناقض بين الفرح الصارخ والاستسلام الكامل .

السجان : انت فين يا كمال ؟ رجعنا تانى لللاعيب بتاعتك ؟ ع العموم انت حر ! تستخبى ماتستخباش دا شأنك! ما دام انت فى الزنزانة بتاعتك خلاص ... بعد كده بقى عندك حريتك الشخصية .. تقدر تعمل اللي انت عايزه .. (يتجول على المسرح محاولا اكتشاف مخابأ كمال) حتكون فين يعنى ؟ تحت السرير؟ ورا الدولاب؟جوه الدولاب ؟ تحت المكتب؟جوه المكتب؟(يضحك بعصبية) موش مهم (المهم انك موجود .. دا اللي أنا عارفه ودا اللي أنا واثق منه .. موش ضرورى الواحد يشوفك عشان يعرف انك موجود .. (يتحسس المفتاح فى جيبه) أنا إالى شايلى المفتاح وأقدر أخش لك وقت ما انا عايز واخرج من عندك وقت مانا

عايز .. بس موش هوه ده مصدر حريتى .. حريتى
مصدرها اليقين! اليقين يعنى التأكد .. يعنى أنا متأكد انك
هنا .. ما فيش عندي أى شك .. خلاص .. (يضرب كفا
بكف) شوف سخريه القدر ! وأنا جاي النهارده ونفسي
مفتوحة لك وعايز أقعد معاك قعدة طويلة بعد ما ودعت
الشك للأبد ! وبعدين نفسي أسألك سؤال ! أنت بتستخبي
منى ليه؟ دانا صاحبك وحبيبك اللي اتعلم منك حاجات
كثير .. وقبل ما تيجي هنا كنا جيران وطلعنا بلديات
كمان.. ولو انك ماكنتش تعرف ان أنا كنت جارك
(يضحك) يالله يا كمال يا صاحبى، اظهر وبان عليك
الامان.. خايف من ايه ؟ والا يمكن عايز تهرب ؟ وتهرب
ليه وتهرب من ايه ؟ الكلام ده ، كان يبقى مفهوم لو كنت
خايف يقبضوا عليك .. لكن خلاص .. انتهينا .. اديك
اتقششت واعترفت واتدبست .. واديك هنا هه معاي
وقدامى .. يالله بقى ماتدوخنيش .. دانا جايب لك اكل
ظريف النهاردة وأنا عارف انك جعان.. وانت بقى لك كام
يوم ماكلتش (فى فزع) يانهار مهبب .. ماداهية تكون مت
لا لا لا .. موش ممكن .. (يتفحص المكان ثانيا)
انت هنا ومية فى المية هنا .. اطلع بقى أحسن لك .. اطلع
بقى بقولك أحسن والله والله .. (يرتبك) اسمع أما
اقولك.. (يصرخ) أنا حاخرب بيتك .. حابلغ انك هريت ..
(بسرعة شديدة) حيضاعفوا لك المدة .. خارج بالاكل ..

حاديحك.. حاسلحك.. حاقطحك للكلاب.. حارميك للقطط..
(ياخذ منه جهد الصراخ مأخذاً ويحس بالإرهاق الشديد
والدوار ويكاد يسقط إعياء) كده ؟ تعمل فى كده ؟ أنا..
بعد كل اللي عملته عشائك ؟ انت صحيح علمتنى كثير..
لكن انا برضه خدمتك من ساعة ما عرفت انت مين وجيت
هنا ليه.. تعرف ان احنا دفعة ثانوية عامة واحدة؟! شوف
القدر.. أنا ارواح البوليس وانت تخش الآداب! هو ده اللي
فسد مخك.. وعشان كده كان لازم انصف لك الزنانه
م الكتب والكلام الفارغ اللي كان فيها.. والحمد لله -
نجحت! شلت الراديو اللي كان عامل دوشة ملهاش آخر..
والجرايد اللي كانت بتتفرزك.. يعنى فعلا خلقتك الجو
المثالى للراحة والهدوء.. وبصراحة أنا بحب زنزانك دى
أكثر من أى حته فى السجن.. الواحد يقدر يقعد يتكلم
ويتبجح (يضحك) بس أما تطلع حاتكلم مع مين؟! (يدور
فى قلق على المسرح) اطلع بقى الله يهديك.. حتفضل
لامتى هريان؟! وحنهرب ليه وازاى وفين؟! ما انت عارف
اللى فيها.. الزنانه مقفولة والعنبر مقفول والحوش مقفول
وياب السجن مقفول وحوش السجن مقفول.. وبره حوش
السجن برضه مقفول! (يضحك ثم يتحول الضحك إلى
صرخات مكتومة) موش ممكن تكون هربت صحيح؟!
يانهار اسود (انت فين ياكمال؟! كمال! (يصيح بأعلى
صوته) كمال! كمال! (يجن جنونه ويتحرك فى كل مكان

كأنما لسعته عقرب) اطلع بقول لك.. اطلع والا اطين لك
عيشتك وعيشة اللي خلفوك كمان.. اطلع يا ابن الكلب
(يضرب جميع الأماكن بقدمه ويديه) أنت هربت؟ يبقى أنا
ضعت.. يا خلق هو.. (يصيح فى جنون) الحقونى.. مجرم
خطير هرب.. الحقونى.. (يتجه إلى الباب فى تهالك
وفجأة ينقض السجين عليه من الخلف ويحدث صراع
قصير يتقلب فيه السجين ويكتم فم السجان ويجلسه
على الكرسي ويوثق يديه خلف ظهره).

السجين : يا ساتر ! أنت ما بتزهقش م الكلام ؟! إيه اللي حصلك
النهارده ؟! كنت دائما هادى وساكنت وأنا.. أنا اللي كنت
باتكلم! جاي تدينى محاضرة سيادتك عن الحرية
والسجن؟ ناقصك انا ؟ أنا بصراحة زهقت منك! وقررت
أتخلص منك! والنهارده قبل بكرة.. ودلوقت! بقى عشان
ماكننا جيران ومراتك زى ما بتقول كانت تعرفنى جاي
تلزق لى؟! ما فيش مساجين ثانية عجيبوك؟ والله عال عال!
(فجأة) والا يمكن عشان اسمك على اسمى؟! لا يا ملك..
لا! أنا حادبك.. وحالا.. أهه.. أدى السكينة (يخرج
سكيننا يلمع نصلها فى الهواء) شايف بتلمع ازاي؟ حامية
زى الموس.. كل اللي حاعمله انى حاكتب ورقة - (ينقض
عليه بالسكين ويقترب النصل حتى عيني السجان) ما
انتش خايف يعنى؟ لو واحد غيرك كات طلعت روحه.. كات
جات له سكتة .. كان طب.. ولا كلمة.. (بيتعد عنه) أه..

فهمت.. واثق انى موش حابجك احسن اروح فى حديد!
(يضحك) طب مانا فى حديد اه؟ لا لا لا.. انت عارف
انى ما قدرش اوى نفسى فى داهية .. كوني قتل مرأتى
مش معناه انى قتال قتلا.. دى نقرة ودى نقرة.. مرأتى
كانت بتاعتى.. يعنى ملكى.. اقلها ما اقلهاش انا حر..
لكن انت بقى حاجة ثانية.. (يتجول مفكراً) ومع ذلك لازم
اتخلص منك.. لازم تموت.. ازاي؟ ازاي ياكمال ازاي؟ ما
هو سكتة موش حتجيك سكتة.. لكن ممكن تنتحر!! أما
فكرة عبقرية.. تنتحر بصنعة لطافة.. ازاي؟ تقطع عروق
ايدك طبعاً.. واهى مربوطة ورا ضهرك وكله تمام..
(يتلمل السجان فى كرسية ويحاول الكلام بكل الطرق
فلا يستطيع فيهرز نفسه ويحاول ان يقلب الكرسي) تعبت
انت من حكاية الانتحار دى؟ ليه؟ دى حاجة طبيعية جدا..
الإنسان لما تضيق بيه الحياة زى ماضاقت بيك ما يقدرش
يستمر.. يعلن! الإضراب. يقول موش لاعب.. يصرخ فى
وش الدنيا والناس.. كام سنة فى السجن ياناس:
ماعدتش استحمل.. موش لاعب! صح؟! (يتنبه إلى أن
السجان لا يستطيع الرد) موافق معاً طبعاً؟ حقول لهم
هددى انه ينتحر ويلزق التهمة فى عشان يعدمونى..
حاصرخ واعيط واهد الدنيا عليهم.. كدهه! (يمثل الصراخ
والعويل ويخبط المقاعد بقدمه ويجرى من مكان إلى مكان)
كمال انتحر! الحقونى... يا خلق هو.. كمال انتحر! (اثناء

ذلك ينجح السجان فى فك يديه ويزيل الكمامة من على
فمه وينهض فيتنبه السجين ويتخذ منه موقف المتنمر)

السجان : أنا حاربك فى داهية!

السجين : فكيت نفسك؟

السجان : حاخرب بيتك!

السجين : اتحررت؟

السجان : حيقطعوك حقت..

السجين : السكنة لسه معاى!

السجان : حيطلقوا عليك الكلاب..

السجين : خش على لوراجل..

السجان : لا يمكن حتفلت المرة دى..

السجين : خوش امال.. خش.. (يزوم مثل النمر) خوش على..

السجان : حاكتب تقرير..

(يتحاوران على المسرح كأنهما يتصارعان أو يستعدان
لجولة مصارعة)

السجين : خش بقولك..

السجان : حتندم يا كمال..

السجين : خش على.. خليك راجل

السجان : (يقف فجأة ويقرر عدم الصراع) موش مهم..
السجين : خسارة!
السجان : يا بخت من قدر وعفى..
السجين : (ساخرًا) الطيب أحسن؟
السجان : أنا كنت جاي في حاجة مهمة.. لكن بقي ما دام انت أخذ
المسألة كده.. لازم أروح أكتب التقرير..
السجين : عايزهم يعملوا في ايه أكثر من كده؟
السجان : موش مسألة يعملوا.. التقرير مالوش دعوة.. دا واجب
ما فيش مفر منه..
السجين : (ملاطفاً) حتقول إن سلوكي كويس؟
السجان : سلوكك؟!
السجين : يعني!
السجان : عايزنى أقول انك هادى الطبع؟ لين الجانب؟
السجين : يمكن يحاكمونى! ماتنساش ياكمال يا صاحبي ان أنا
محبوس رهن التحقيق!
السجان : لا لا لا.. دا موش شغلى.. أنا ممكن أقول ان قوتك
العضلية ممكن الاستفادة بها في تقطيع الأحجار.. (كأنما
يقرأ من ورقة) ومن ثم نوصى بنقله إلى الجبل ليساهم في

الاعمال الإنشائية أو على الأقل فى إعداد الصخور التى
نحتاج إليها فى البناء وإصلاح الطرق...

السجين : (ساخرًا) حلو قوى .. جميل .. رائع !

السجان : تقرير ظريف ؟

السجين : أنت أظرف !

السجان : أصل ما فيش حته تانيه تقدر ننقلك لها ..

السجين : وعايير تنقلنى ليه بس ؟

السجان : ماهو واضح انك زهقت منى ..

السجين : حد يزهد منك ياراجل

السجان : (فى عتاب رقيق) أنا لاحظت فى الفترة الاخيرة انك
موش مستريحلى وزى ماتقول كده .. (يتردد) أخذ منى
موقف !

السجين : (مرعوبًا من عواقب هذا الكلام) أنا .. أخذ منك أنت ..
موقف ؟ (ملاطفًا) بقى دى معقولة دى ؟

السجان : (لهجة العتاب مستمرة) وموش بس أخذ منى موقف ..
دانا زى ماكون عدوك !

السجين : (منتهى اللين) ليه بس كده ياكمال يا صاحبي ؟ ليه تقول
الكلام الوحش ده ؟

السجان : (فى عتاب كأنما هو طفل يعاقب أمه) كل ما أجيلك

تهاجمنى... وتخوفنى.. ده ذنبى انى نقلتك هنا وبعدتك عن
دوشة المساجين؟ ده ذنبى انى مريحك وباسطك آخر
انبساطه لو تعرف اد ايه باعزك ياكمال.. دانا شايلك على
كفوف الراحة .. (فى انفعال) من ساعة ما عرفت انك
كنت ساكن جنبنا فى بحرى وانا باودك وباحن عليك ..
انت فاكر معنى انك لو رحت طره حائسطة؟

السجين : حتلاقى مين تضربه ولا يشتكيش زى؟

السجان : اضربه ؟ أنا باضربك يا كمال؟

السجين : لا العفو .. أنا اللي باضرب نفسى !

السجان : ياكمال ده موش ضرب.. ده شغل !

السجين : رياضة ؟

السجان : دى مهام وظيفتى .. طبيعة عملى ..

السجين : أه .. قول كده .. دلوقت فهمت..

السجان : والله انت لا فهمت ولا حاجة .. أنا يا كمال قلبى بيوجعنى

لما باشوفك بتتالم .. ويتصعب على .. وحتى باتالم والله ..

السجين : لكن لازم تقوم بالواجب طبعاً!

السجان : « فجأة » اسمع .. انت موش لا حظت انى من مدة

ماضريتكش ؟

السجين : وايدك بتاكلك !

السجان : بتاكلنى ايه اخص عليك! أنا حالفى الضرب خالص ..

وحاسب اقتراح طره ..

السجين : هو انت كنت قدمته؟

السجان : الحقيقة .. فى لحظة غضب -

السجين : طب والعمل ؟

السجان : حاسبه .. وحاجيب لك كل حاجة عايزها .. (فى ود شديد) انا مستعد حتى اديك مفتاح (يقمض له) يعنى ! حاجة كده تقدر تزوغ بيها ان كنت عايز !

السجين : (غير مصدق) انت .. انت .. عارف انك بتقول ايه ياكمال؟

السجان : (فى حماس) عارف بومسئول عن كل كلمة .. (يقترّب منه هامسا) بس عندي طلب صغير ..

السجين : خير ..

السجان : تعترف لى قتلت مراتك ليه !

السجين : (يضحك ضحكا شديدا) حلوه دى .. حلوه خالص .. (ضحك هستيرى) احلى حاجة قلتها فى حياتك !

السجان : (ماخوذا برد الفعل العنيف وغير المتوقع) انا متأسف ان كنت زعلتك!

السجين : (الضحك مستمر) بالعكس .. دانت بسطتني خالص - فرشتني .. نعنشتني .. هوستني ..

السجان : حقه على.. أنا (متريدا) كان عندي أمل .. اصلك مرة -

السجين : (يهذا ضحكته) مرة ايه؟ اعترفت؟

السجان : لا.. كنت كلمتني عن سلومة..

السجين : مراتي..

السجان : وقتلت انها كانت صاحبة حسنة الروح بالروح..

السجين : تمام.. حسنة عبد العال.. كانت جارتنا لزم.. وقبل كده..

أه.. كانوا بيشتغلوا مع بعض فى المدرسة القومية فى

ميت جناح مع بعض كام سنة.. دول كانوا مايسيپوش

بعض أبدا لحد ماجينا مصر بقى.. كانوا .. (يتردد) على

ايه.. ما خلاص بقى..

السجان : (باهتمام شديد واستغراق رهيب) ايوه.. كانوا ايه ..

كانوا ايه.. كنت بتقول -

السجين : وانت يهك ده فى ايه؟

السجان : (يبلع ريقه وقد استغرق تماما فيما يقوله

السجين) قول ياكمال .. أنا مستعد اخليك تخرج

النهاردة.. أوعدك.. أوعدك انك تخرج النهارده..

السجين : وبعدين معاك بقى؟

السجين : أوعدك.. أوعدك.. أبوس ايديك .. عايز أعرف .. (ينحنى

على ركبتيه) أبوس رجلك.. كانوا ايه..

السجين: انت حطير لى مخى يا جدر انت؟ قوم.. عيب.. قوم بقول لك.. (يعينه على الوقوف ثم يحملق فيه) انت عايز تعرف ايه؟

السجان : انت كنت بتقول انهم عاشوا مع بعض واثروا على بعض ..
يعنى كانوا زى بعض وانهم.. هه..هه.. كنت بتقول.. (يبلع ريقه فى لهفة)

السجين : انا ما قلتش..

السجان : لا.. مرة قلت لى ان سلومة كانت حاجة صعبة قوى
وماحدث يقدر يشكمها..

السجين : وانت تعرف سلومة منين؟

السجان : مش كانت صاحبة حسنية؟

السجين : وحسنية تبقى لك ايه؟ اوعى تقول لى مراتى!

السجان : بلاش اقول؟

السجين : تقول ايه؟

السجان : مراتى!

السجين : (يدور فى حيرة) ماهو يانا مجنون يانت مجنون.. عايز
تقول ان حسنية مراتك انت؟

السجان : عارف ان شكلى موش قوى..

السجين : انا مالى ومال شكلك.. انا أقصد الظروف .. الظروف..

الدنيا.. موش ممكن.. احنا عشنا سوا تقريبا.. كنا جيران
واكثر من جيران.. وعمري ماشفتك.. كنت عارف ان
حسنية جوزها - آه .. افنكرت..

السجان : كنتوا بتشتغلوا مع بعض فى الثقافة.. بعد ما سبتوا
الوزارة..

السجين : (ساخرا) يعنى عارف كل حاجة أه؟!

السجان : أنا عايز أعرف منك.. أنا ما اعرفش حاجة أبدا..

السجين : عمري ماكنت أتصور ان حسنية متجوزاك انت..

السجان : اللى حصل ياكمال..

السجين : حسنية.. المرأة الكاملة.. الإنسان.. فاهم يعنى ايه؟

السجان : طبعاً.. موش مراتي؟

السجين : ولا انت فاهم ولا عمرك حتفهم.. (يضرب كفا بكف) بقى
حسنية تبقى مراتك انت؟

السجان : كثير على أتجوز واحدة عينيها زرقا وشعرها اصفر..

السجين : شعرها احمر!

السجان : احمر ولا اصفر.. حسنية كات شكل بس.. زى بقية
الستات..

السجين : وانت عارف بقى بقية الستات؟!

السجان : حاجة صعبة قوى؟
السجين : ولا صعبة ولا سهلة.. انا حاقفل ع الموضوع ده.. فين
الاكل؟

(يتجه الى المكتب ويكشف الغطاء
عن الطبق ثم يعيده مكانه)

إلهى يسد نفسكو

السجان : حقه على يا كمال .. ماتزعلش منى..

السجين : وانت ذنبك ايه ؟ هم اللى عطوك الاكل توصله..

السجان : ماقصدش الاكل..

السجين : (ساخرا) فيه حاجة تانية ؟

السجان : لا مافيش ..

السجين : خلاص .. اتفضل ..

السجان : (فى استسلام) سلامو عليكو..

(يعود السجين إلى الطبق فيعيث به ويأخذه إلى

اقصى اليسار بينما يخرج السجان المفاتيح ويتجه

إلى الباب فيحاول أن يفتحه فلا يستطيع فيثور)

انت عملت ايه فى الباب ده؟ افتح ياقول لك! انت عملت ايه

فى الباب ؟ ايه اللى حصل له ؟! افتح .. افتح بقولك !

السجين : أنا .. أفتح ؟

السجان : والله ان ما فتحت ! أنا فهمت حيلك والأعيبك .. عايز
تحبسنى معاك هنا ؟! لا يا عم ! أنا موش مسجون .. أنا
حر .. أقدر أدخل وأخرج زى مانا عايز .. أفتح الباب والا
أقفله على كفى .. معاى المفاتيح وأقدر أخش .. أفتحى ..
(يطرق الباب بشدة) أفتحى بقولك .. أفتحى أحسن
أكسره على دماغك ! (يطرق) أفتحى .. أنا عارف إنك
جوه .. تطفى النور تولعى النور أنا عارف إنك جوه ..
أفتحى .. بتعملى إيه عندك ؟ أفتحى .. أفتحى ..

السجين : (فى نبرات واثقة كأنها قدرية) قافلة على نفسها من جوه..

السجان : (صارخا) موش ممكن .. أنا اللى معاى المفتاح ..

(فجأة يقف ويتنبه إلى أن الحديث يدور عن امرأة

وليس عن رجل - يمسح العرق من جبينه ويستدير

إلى السجين)

انت قلت إيه ؟

السجين : أنا ماقلتش حاجة ..

السجان : انت بتتكلم على مين ؟

السجين : موش أنا اللى باتكلم ..

السجان : انت قلت

السجين : انت اللى قلت

السجان : أنا قلت

السجين : افتحى

السجان : افتحى ؟

السجين : قافلة على نفسها

السجان : المفتاح معاى أنا بس ..

السجين : المفتاح موش مهم

السجان : أنا اللى أقدر أفتح ..

السجين : وتفتح ليه ؟ عايز تشوف ايه؟ موش يمكن لو اتفتح الباب

تشوف حاجة موش عايز تشوفها؟ إذا كنت حر صحيح ..

سيب الباب مقفول.. وحتى لو فتحته .. تقدر تشوف اللى

قدامك أو ما تشوفوش .. وفى الحالة دى ما ييقاش

موجود.. ما هو الموجود يبقى موجود عشان بنشوفه ..

السجان : (ذاهلاً) انت بتقول ايه ؟

السجين : حسنية قاعدة فى الضلعة .. لوحدها ..

السجان : ليه ؟

السجين : وانت مالك ! شائك ايه بالدنيا بتاعتها .. العالم الكبير ..

الواسع العريض اللى مالوش آخر .. بتاعها .. بتاعها هى

بس .. (ساخراً) عايز تخش؟ موش ممكن .. مالکش وجود

فيه .. حسنية خلقتة وهندسته وزينته بكل حاجة جميلة فى

الوجود ..

(فجأة) كمال .. تعال هنا ..

(صمت - يتبادل الرجلان نظرات ترقب)

(يقترب منه السجان في شبه ذهول - يسحب من يده

ويجلسه)

أقعد .. أنا حاساك سؤال واحد.. موش مهم تجاوبني
عليه.. لأن المهم هو السؤال نفسه ..

السجان : سؤال ايه ..

السجين : أبدا.. أقصد يعني.. هل انت عمرك فكرت ايه اللي
بيربطك بحسنية ؟

السجان : بيربطني ازاي ؟

السجين : يعني ايه اللي بيشدك لها وبيخليك عايزها وقلقان عليها
ويتفكر فيها - (صارخا) العلاقة يعني يا أخى!

السجان : علاقة ايه.. مش مراتي؟

السجين : سلومة مراتي .. ولكن.. افهمنى ياكمال.. اللي كان
بيشدني لها.. واللى كان بيبعدني عنها فى الوقت نفسه..
هو غموضها.. هو انى ما كنتش فاهمها.. وماكانش ممكن
أفهمها.. وللأسف ما عرفتش ده الا بعد فوات الأوان

السجان : وحسنية كده ؟

السجين : انت بتسألني؟

السجان : ما عرفش..

السجين : ماتعرفش ايه؟ حسنية كانت المثل الأعلى بتاع سلومة كانت
تقعد معاها بالساعات والأيام تحكى وتقرأ وتكتب زى
ماتكون هربت م العالم ده لعالم تانى خالص.. أنا بكل
أسف ماكنتش بأقدر أقرب من العالم ده.. وفرصتى
الوحيدة لمعرفة حسنية كات عن طريق سلومة.. اللى
ماكنتش فاهمها أنا نفسى!!

السجان : لكن.. أنا عارف أنها تعرفك..

السجين : حسنية زارتنى مرة واحدة فى المكتب.. سحرتنى ! قعدت
تتكلم وقعدت أنا.. أنا الكبير واللى مفروض إنى رئيسها..
قعدت ساكت ومسحور وباسمع زى العيل الصغير لما
يسمع حواديت أمه والا حواديت جدته..

السجان : حكيت لك ايه..

السجين : (يضحك) لا ماتخافش.. عمرها ماجابت سيرتك كان
واضح ان مشكلتها مالهاش دعوة ببك..

السجان : أمال حكيت لك ايه؟

السجين : موش فاكر التفاصيل.. لكن الصورة اللى سابقتها فى
خيالى هى صورة حصان برى بيجرى.. فرصة بتبرطع فى
الغيطان إنسانة موش ممكن تربط نفسها بمكان ولا زمان
قلب حر يفضل يدور ويتنطط من مكان لمكان..

السجان : من وزارة لوزارة..
السجين : ومن مدرسة لمدرسة..
السجان : ومن راجل لراجل!
(صمت متوتر)
السجين : انت قلت ايه ياكمال؟
السجان : لا.. (متريدا) أنا باقول يعنى .. قصدى -
السجين: حسنية خانك ياكمال؟
السجان : ما عرفت.. لكن انت بتقول -
السجين : (مقاطعا) أنا عايزك انت اللى تقول..
السجان : كات دايما تنتقل وتعيش فى بلاد كثير..
السجين : زى ما عاشت مع سلومة فى ميت جناح .. زى ما كنتو
جيراننا .. لكن - خانك؟
السجان : كانت دايما تقعد فى الضلعة..
السجين : جاوبنى!
السجان : وتقفلى على نفسها..
السجين : جاوب!
السجان : ما اعرفش .. ما اعرفش.. هو تحقيق والا ايه؟
السجين : انت اللى بداته.. حسنية ياكمال بعدت عنك وعن الناس

لان الجسور اللي بينها وبينهم انكسرت.. وأول واحد
كسر الجسور دى هو انت..

السجان : انت بتتكلم على ايه ؟

السجين : الجسور دى باختصار جسور فهم.. اتصال تواصل..
صعبة عليك دى؟

السجان : ماكناش فاهمين بعض؟

السجين : مش مهم الفهم.. المهم محاولة الفهم.. انت عمرك فكرت ان
حسنية دى بتكتب وتنشر لها بالفعل إنتاج كويس؟

السجان : وده دخله ايه؟

السجين : عمرك سالت نفسك حسنية نفسها تبقى ايه او تعمل ايه؟
ياكمال أنا موش بلومك أبدا.. إنه كمان عمرى ماحاولت
أفهم سلومة.. كل اللي فى دماغى هو انى افتح عليها
الباب.. يعنى افرض نفسى على حياتها حتى من غير
مااعرف ايه هى حياتها.. كنت متصور ان احنا مادام
متجوزين يبقى لازم أكون موجود جواها.. جوه حياتها
الخاصة.. جوه أفكارها زى أنا ماموجود جوه مشاعرها
وببيتها.. (فى ألم) كنت متصور ان التفاهم معناه انى
أقتحم عليها دنياها.. أحشر نفسى فى كل حاجة تعملها
وكل حاجة تفكر فيها.. لكن .. ياخسارة.. كنت فاكر انى
لازم أكون الإنسان الوحيد فى حياتها.. (فى دفع) النوع

ده من البشر يا كمال لا يمكن حد يمتلكه.. لا راجل ولا ست..
حياتها لازم يكون فيها غيرى وغيرى وغيرى..

السجان : الخاينة..

السجين : (ساخرا) خاينة! يعنى ايه؟ وافرض!

السجان : افرض ازاي بقى؟

السجين : خلاص.. انا قلتك كل حاجة..

السجان : كمال يا حبيبى اعذرني.. انا دماغى بيغلى زى ما يكون
فيه نار.. أرجوك .. ريحني.. انت عارف حاجات كتير
ومخبى على.. أرجوك أبوس ايديك.. قول لى .. صارحني..

السجين : عايزنى اقول ايه تانى؟

السجان : الحقيقة..

السجين : وتعمل بيها ايه؟ انت كتبت على نفسك تعيش فى سجن
من الشك.. ولا يمكن حتصدقنى مهما قلتك.. مشكلتك
انك اخدت ع الشغل لحد ما الناس كلهم بقم فى نظرك
مساجين.. ماعدتش تشوف الحرية اللي بتيجى م
الاقتناع.. من القبول والرفض فى الوقت نفسه.. لازم
تعترف يا كمال انك كنت .. ويمكن لسه بتعامل حسنية زى
المساجين .. انت لوحدك معاك المفتاح وانت لوحدك اللي
يقدر يقفل ويفتح.. تعمل ايه حسنية؟ تهرب.. بس موش
لبره .. لجوه..

السجان : رجعنا للكلام بتاعك إالى ما يجيبش تمنه!

السجين : كلام فارغ؟

السجان : انت من يوم ماناقتنى فى الموضوع ده وأنا بافكر فيه.. كل يوم اطلع السطوح واتفرج ع الناس.. مالفيتش حد حر.. صح! بص حواليك.. بص م الشباك ده بص ع الناس اللى منورين أوضهم بعد المغرب..

(تتحول الخلفية إلى لوحة شفافة نرى من خلالها
بلكونة فيها إضاءة وغرفة مضادة إلى جوارها على
البعد فى أحد المنازل)

شايف الراجل اللى قاعد فى البلكونة ده؟ تعرفه؟ طبعاً لا..
أنا اعرفه.. لأنه.. زيه زى غيره مربوط من رقبته فى ساقية
الدنيا.. الشغل والفلوس والعيال.. رأيك إنه حر؟

السجين : انت بتتكلم على مين؟

السجان : الراجل اللى قاعد فى البلكونة ده.. ببشرب الشاى بمعلقة
سكر واحدة وحاطط الجرنان على ركبته.. قراه عشر
مرات.. مايفيش حاجة تانية يقدر يعملها.. رأيك انه حر؟

السجين : ليه لا؟

السجان : لأنه مايقدرش يخرج..

السجين : يقدر..

السجان : مايقدرش.. يروح فين؟ يمشى فى الشارع ؟ ممكن طبعاً..

لكن برضه مش ممكن

السجين : ليه لا؟

السجان : لانه مربوط فى ساقية.. مراته وعياله وعيشته كلها ..
شايف مراته؟ أهى! واقفة فى المطبخ المنور ده.. بتحضر
العشا.. خلاص .. رتبت كل حاجة.. كل دقيقة من وقته
معروف حيعمل فيها ايه ..

السجين : وهى بقى السجان بتاعه؟

السجان : لا طبعا .. لكن -

السجين : انت شطحت قوى ..

السجان : كده؟ شايف السطوح المنور هناك ده؟ فيه ايه؟ فرح! حلوة
كلمة فرح دى؟ خلى بالك.. موش حفل زفاف.. لا.. فرح!
يعنى واحد فرحان والا واحدة فرحانة.. بايه .. بانه سلم
نفسه لواحدة ترتب له حياته وتربطه فى الساقية بتاعة
الدنيا.. هى دى الحرية؟

السجين : ايه الفلسفة دى كلها؟

(تنظف انوار الشاشة ويعود الحائط)

السجان : مش الساقية دى اللى انت بتسميها الجسور؟

السجين : سميها السلاسل ان كنت عايز!

السجان : وحسنية بقى كسرت السلاسل!

السجين : ماكانش فيه بديل..

السجان : كفاية مغالطة بقى ياكمال.. انت بتلف وتدور ليه؟ خايف على ؟ فاكرنى موش حاقدر أقف على رجلى واتحمل المسئولية اللى انت اتحملتها؟ ليه بتقول كلام ضد افكارك.. ضد اللى انت عملته بايدك دى! ياراجل يا .. حر!

السجين : (ساخرا) دانت الظاهر رضيت عنى!

السجان : من يوم ماجيت هنا ياكمال حياتى كلها اتغيرت! كنت لأول مرة باشوف قدامى راجل حر .. ماكنتش فاهم ده معناه ايه .. ع الورق انت متهم زيك زى غيرك.. لكن بالنسبة لى ياكمال.. انت الحر الوحيد.. الراجل اللى قدر يقطع الشك بسكينة صغيرة ! انت شكيت فى سلومة.. عرفت عنها اللى أنا عرفتة عن حسنية! لكن انت راجل ومش ممكن تعيش فى عذاب.. ساجن نفسك ورا باب مقفول زى ويتقول ياترى مرااتى بتخونى والا لا .. ما كانش ممكن.. لأنك حر..

السجين : انت فاهمنى غلط خالص..

السجان : بالعكس أنا مأفهمتكش زى مأفهمتك دلوقت .. أنا بقى لى فترة عايش معاك وجواك وماليش هم غيرك.. راقبتك ولاغيتك وكلمتك وداريت عنك أخبار الدنيا المقرفة.. عشان تصفا لى وتعترف لى .. (فى ألم) كنت بأضربك كإنى

باضرب نفسي.. غيظي من نفسي واحتقاري لضعفي..
كبت على نفسك لحد مازهقتك مني وخليتك تكرهني..

السجين : أنا ما با كرهش حد.

السجان : اسمعني الآخر أرجوك.. أنا استحملت ده كله عشان
أحس قد ايه الإنسان يقدر يستحمل.. وانت .. استحملت
زى البطل.. بصيت لنفسى وقتل لىمتى حافظل محبوبس
فى سجن الشك . وسجن حسنية.. كان لازم أخرج م
السجن بتاعى.. سجن شكوكى وسجن ضعفى قصاص
جمال!.. عينيها الزرقا وشعرها الأحمر.. سجن عجزى
عنها.. عجزى عن أى حاجة.. (فى انهيار تام) كنت بامرت
فى اليوم ميت مرة.. أروح م السجن الاقى نفسي فى
سجن تانى رهيب.. الاقى نفسي محاصر بمليون سؤال..
ياترى كانت فين؟ ياترى كلمت مين؟ ياترى فكرت فى ايه؟
أكلها ترد على بآه أو لا .. كل ما احاول اقرب منها
تسيبنى وتقفل الباب وراها.. الاقى نفسي باجرى فى
الشارع موش عارف رايح فين ولا جاى منين.. وقدامى
صورة الراحل العظيم اللى فضل السجن على حياة
السجن !

السجين : اذا كان قصدك سجن الشك -

السجان : (مقاطعا) سجن الضعف ياكمال..

السجين : كنت عايزنى اعترف لك انى قتلت سلومة عشان ضعفى..

السجان : عشان قوتك..

السجين : انت مستحيل التفاهم معاك النهارده..

السجان : بالعكس .. النهارده بس.. التفاهم بقى ممكن ..

السجين : ياكمال أنا حاولت أشرح لك أني ماقدرتش أواجه واحدة

حرة.. سلومة كات أكبر منى.. روح طايره بجناحين ..

دنيته أكبر من دنيتنا.. كان مستحيل - حاجة جواى كات

بتقول لى مستحيل تقبل حرية سلومة..

السجان : وماقبلتهاش! رفضتها.. اتأكدت، وضربت ضريتك..

السجين : اتأكدت من إيه؟ كان قدامى فرصة أثبت لنفسى أنى حر..

انى أقدر أشوف الباب مقفول عليها وماخبطش عليه.. كان

ممكن أقول لنفسى أنا واثق م اللى جوه.. موش عايز

أفتح.. لو فتحت موش عايز أشوف اللى قدامى .. لكن فى

لحظة ضعف فتحت -

السجان : فى لحظة قوة ..

السجين : لحظة ضعف ..

السجان : قتلتها ..

السجين : أفندم ؟!

السجان : قتلتها! واستريححت للابد!

السجين : قتلت مين؟

السجين : تسلمت الشاة للابلد .. راح .. زال .. وانت سبوت (في
استغراق عتيق) ما عديش فيه عيتين زرقا ولا شمشايك
حسرا تنده اللي يسوي واللي مايسراش .. خلاص يا ابو
كمال .. الواحد يتر يرفع راسه ويتكلم .. ويقول .. من غير
خوف .. خلاص يا ابو كمال ..

السجين : في (قيس) انت بتكلم على سن؟

السجين : مايتقار فيه حد يقفل على نفسه من جوه .. مايتقار في
اسرار ولا الغار ..

السجين : (في زعر) انت عملت ايه يا كمال؟

السجين : كان لازم يا صاهبي .. كان لازم احذر نفسي من جوه ..

السجين : كمال .. انت -

السجين : ايوه .. قتلها ..

السجين : حسنية؟

السجين : قذلت العيتين الزرقا للابلد ..

السجين : قتلها امتي يا كمال؟

السجين : ما اعرفش .. ما تسأنيش .. الاوده الضلعة اتفتحت ..
ونورت .. ما عديش فيه ضلعة .. (يقبل عليه بشغف ويحاول
احتضانه) وانت السبب .. انت اللي انقذتني .. عرفت ليه
أنا بحبك وعمايزك جنتي دايماً .. ومن يومها يا كمال ما

عدتش أقدر أضريك..

السجين : (فى ذهل) يخرب بيتك.. وعملت ايه فى الـ

السجان : ما اعرفش..

السجين : وديتها فين؟

السجان : ما اعرفش.. نقلتها.. رميتها فى الجبل..

السجين : يا كمال يا مسكين.. تعال جنبى.. تعال.. (يسحبه من يده

فى رقة) انت عملت ايه؟ أنا خليتك تعمل ايه؟ وحاكفر

دلوقتى عن ذنبى ازاي؟! أنا كدبت عليك يا كمال.. أنا

عمرى ما قتلته حد.. ولا رفعت سكينه فى وش حد.. غير

وشك انت!

السجان : انت معترف يا كمال..

السجين : أنا ما قتلش سلومة يا كمال.. أنا ما قتلش حد أبداً..

السجان : أمال مين اللى -

السجين : قتلها؟ ومين قال انها اتقتلت؟!

السجان : ازاي بقى؟

السجين : سلومة هربت يا صاحبى..

السجان : هربت منك؟

السجين : لا.. موش منى.. م الدنيا.. هجت.. اختفت.. فص ملح

وداب..

السجان : يس انت معترف.. انت المتهم..

السجين : بالضبط.. معترف ومتهم..

السجان : والجريمة؟

السجين : جريمة ايه؟

السجان : ازاي اثبتوا -

السجين : ما اثبتوش.. ماتتساش يا كمال.. أنا هنا محبوس رهن التحقيق..

السجان : عشان اعترفت..

السجين : كان لازم اعترف.. لازم أواجه الناس وأواجه نفسي.. لكن طول ما المحقق موش شايف دليل مادي قدامه.

السجان : يعنى جسد الجريمة -

السجين : ما فيش! مين يقدر يلبسنى التهمة.. (ساخراً) التهمة اللى لازم ألبسها ولازم افضل لابسها.. ما قدرش أعيش من غيرها..

السجان : لكن انت -

السجين : معترف! قطعاً يا حبيبى.. ولازم أفضل معترف.. السجن بالنسبة لى احم من حياة الشك وعذاب التفكير.. خلينى اعترف لك اعتراف أحسن.. أنا عجزت يا كمال انى أعمل

علاقة.. أى نوع م العلاقة مع أى حد.. أنا كنت بأقفل على
نفسى الأوضة وأفضل فى الضلمة لأنى ماكنتش أقدر
أواجه واحدة حرة.. الحياة كانت جحيم.. الليل ضلمة
مالهأش نهاية والنهار طريق يوصل للضلمة.. سبت
الشغل.. ما كانش فى حياتى غير الخلاص م الشك..
الشك.. الذى بكل أسف حيعيش معاى للابد.

(يدق الباب ويدخل ضابط ويقرأ من ورقة بعد قليل)

الضابط : مساء الخير يا فندم.. (إلى السجين) فيه تطورات فى
قضيتك يا كمال.. طلبك التحويل للكشف عند طبيب
أمراض عقلية رفض..

السجان : أمراض عقلية؟

الضابط : جانا من وكيل النيابة تقرير عايزك تسمعه.. * عثر بعض
الصبيان أثناء لعبهم الكرة فى منطقة السياجى بالجبل
على -

السجين : ما تكملش.. مراتى..

الضابط : (مستمراً) وسوف يتم عرضها على المتهم ليتعرف
عليها..

السجين : شعرها أحمر.. وعينها زرقا..

الضابط : تمام!

السجان : (يتمم فى هلع) حسنية!

السجين : (صارخاً) سلومة! سلومة يا كمال!
الضابط : ع العموم.. من واقع الاعتراف يبدو أن دى جريمة شرف..
وجرايم الشرف عقابها بسيط... وانت تقريباً قضيت المدة
اللى حيتحكم بيها عليك – يعنى ممكن تخرج على طول..
السجان : يخرج؟ ! (فى لوثة) يخرج فين؟ يروح فين؟
الضابط : احنا لازم ننقله دلوقتى يا فندم – حضرتك عارف
الاجراءات... يالله يا كمال!
السجان : يالله فين؟ وانا؟ انا موش حاخرج؟ انا لازم أخرج.. أنا
برئ يا ناس! مظلوم والله مظلوم! (يصرخ فى جنون)
ماكانش ممكن أواجه واحدة حرة.. مين يقدر يستحمل
الهوا اللى يبهب من كل ناحية.. موج البحر العالى اللى ما
لوش شط... مين يقدر يواجه النار اللى ما فيش ميه
تطفئها.. (فى لوثة ويتحرك فى كل مكان) كان لازم
أتحرر م الشك يا كمال.. حضرة القاضى! عايز أتحرر م
الشك.. قول لى ازاي أتأكد.. يا كمال! انت رايح فين يا
كمال؟! أرجوك.. ماتخرجش وتسيبنى.. أرجوك.. كمال..
انت أملى الوحيد.. خليك معاى هنا.. الغى اعتراك..
انكر.. كمال.. حرام عليك يا كمال.. السجن بقى ضيق
على قوى.. (يبكى) السجن بقى ضيق على قوى..
(ينهار باكي والسجين يرت على كتفه والضابط فى
ذهول لما يحدث بينما تهبط الستار رويداً رويداً)

ستار

الصديقان

● **المنظر :** مكتب أنيق يليق بمدير أو رئيس مجلس إدارة شركة أو مصلحة حكومية. فاخر ووثير - فى الخلف باب مكتوب عليه «المعمل» وإلى اليمين باب يؤدى إلى السكرتير والشارع وإلى أقصى اليسار شرفة ضخمة تلمح منها مآذن القاهرة وقمم البيوت العالية وسماء صافية.

● **الزمن :** الحاضر

● **الشخصيات :** عبده فى الأربعين تقريبا

فتحى نفس العمر

منى فى الثلاثين

عندما يفتح الستار نرى عبده جالسا إلى مكتبه ثم ينهض بعصبية ظاهرة وخطوات آلية ويتجول في الغرفة - يعيد ترتيب بعض الزجاجات على الرفوف في دولاب أدوية واضح - يخرج زجاجة ويتأملها ثم يضعها على حافة المكتب. يخرج دورقا فيه عصير ليمون ومحكم الإغلاق. يفتحه ويضعه على صينية ويخرج كوباً واحداً يضعه إلى جواره ثم يضع الصينية بما عليها على رف قريب. يزيل بطاقة من الدورق - ويتعد ليلقى نظرة على الصينية ثم يعود إلى المكتب فيدق جرسا ولكنه لا يتلقى إجابة. يدير قرص التليفون ويسمع ولكنه يعيد السماع في ضيق. يضرب رقما آخر ويعيد السماع - لا رد - فجأة يقرر إعادة الزجاجات إلى مكانها في الدولاب - ثم يسمع أصوات إغلاق باب فيجري إلى جهاز التخاطب الداخلي مع السكرتارية ويضغط زرا ويبدأ الحديث .

عبده : (في لهجة عصبية ويتعنيف) حمد لله بالسلامة يا هانم! الساعة بقت حداشرا! دى مواعيد عمل دى ولا مواعيد غرامية؟! (يسمع همهمة في الجهاز) مفهوم مفهوم! كل يوم فيه عذر جديد .. مش مهم .. اسمعى .. الغى كل مواعيد النهاردة .. كلها .. ايوه! ما حدش يهوب ناحية المكتب ولا المعمل .. فاهمة؟! أول ما تيجى الدام خليكها تخش على طول .. والدكتور - آ .. نسيت أقول لك الدكتور فتحى عبد ربه .. (يسمع همهمة في الجهاز) هو ميعادهم فات فى

الحقيقة.. بس.. كل حاجة تانية تتأجل.. وقبل ماتمشى ادينى

خبر..

(يلق الجهاز ويسير فى الغرفة فى قلق - ثم يتجه

إلى الشرفة ويتأمل إحدى النباتات).

كل حاجة ممكن تتأجل النهارده.. عشر سنين؟ حداثر سنة؟

حداثر؟ (ينظر إلى الساعة) الساعة بقت حداثر صحيح!

ياترى ايه اللى حصل ؟

(يفتح الجريدة ثم يلقها ويضعها على المنضدة

وفجأة تدخل منى)

منى : (داخلة فى عجلة) خير يا عبده ؟

عبده : أهلا منى .. اتفضللى ..

منى : هيه .. ايه الموضوع الهام والخطر اللى عايزنى فيه ؟

عبده : مفاجأة !

منى : موش فاهمه !

عبده : موش فاهمه ايه ؟ مفاجأة بقول لك..

منى : (بنفاد صبر) واحنا فيه فى حياتنا مفاجآت! أرجوك يا عبده

اتكلم ..

عبده : منى ! انتى بقى لك قد ايه ماجيتيش المكتب؟

منى : يوه! (تزفر فى ضيق) وده وقته برضه؟

عبدہ : من يوم ما اتجوزنا؟
منى : لا .. جيت بعد كده..
عبدہ : مرة أو مرتين ..
منى : كثير ..
عبدہ : لا .. انتى استقلتى من يوم ما اتجوزنا ومن يومها موش
عاجبك المكتب ولا المعمل ..
منى : (فى رقة) أرجوك يا عبدہ .. أنا مش فاضية .. أرجوك ..
عبدہ : المفاجأة اللى عندى بقى .. من بتوع زمان
منى : (تبدو عليها السعادة والدهشة) صحيح؟
عبدہ : صديقى ..
منى : (تفكر وتقول بهمس ودلال) الماظة؟
عبدہ : أغلى وأحسن ..
منى : حتكون ايه؟ غلب حمارى..
عبدہ : أخطر وأهم خبر سمعته فى حياتك ..
منى : (فى دلال شديد) خاص بالبيت؟ فيلا فى -
عبدہ : (مقاطعا وهو يهرع إلى الدولاب) شوفى (يتردد ويقف) انتى
صحيح مستعدة للمفاجأة ؟
منى : عبدہ كفاية بقى .. (فى دلال) دوختنى !

عبدہ : تقدری سمجھائی؟

منی : افسر، نہیں!

عبدہ : ما فیش مانہ یا اتفضلی یا سنی (فی تؤدہ کمن یفضی
یاہم خبر فی الآون العشرین) الدوا الجدید نجح!

منی : (فی دھوا!) أفندم!

عبدہ : الدوا الجدید.. بڑا عظمیٰ الی کلتمک علیہ..

منی : (منفجرۃ) انت جانیہی هنا.. وخليتنی اطح المشوار ده كله
والفی ثلاث مواعید مهمة.. عشان تکلمنی عن دوا؟ انت
فاکرنی منی بتاعة زمان یا سنی عبدہ؟ ماعندکش تقدير؟

ما فیش نظر؟

عبدہ : (یقدم إليها الزجاجۃ) اہہ.. شوفی!

منی : انت اتجننت یا عبدہ؟ (فجأة تتبین انه مرهق وأنه فی
وضع جدير بالشفقة – تلین وتتغیر لهجتها إلى رقة)
یا حبیبی یا مسکین! أنا مقدرۃ تعبک وسهر اللیالی..
معلش.. حصل خیر.. خد (تعطیه قرصاً من حقیبة
یدها) خد ده.. حیهدیک شویة..

عبدہ : (فی لهجة استسلام ویأس) الدوا ده حییدا صفحة جدیدة
فی تاریخ الطب.. کنت عایزک تكونی أول واحدة تشوف
الترکیبة بتاعته (فی یأس) زی زمان..

منى : (تنظر فى الساعة) أنا اتأخرت قوى يا عبده..
عبده : ارجوكى استنى شويه..
منى : انت عارف مشاغلى كويس..
عبده : معلش.. (بيتعد ويقول فى لهجة مأكرة وهو يرمقها بطرف عينه) هو فتحنى زمانه جاي..
منى : فتحنى مين؟
عبده : وهوه احنا عندنا كام فتحنى؟
منى : (فى اضطراب) الدكتور؟
وايه اللى حيجيبه دلوقت؟ هو - هو.. مش عايش بره..
عبده : بعث له مخصص عشان يجيى.. وصل امبارح بالليل وزمانه جاي دلوقت..
منى : ليه؟ قصدى ليه لا.. قصدى جاي لوحده و الا.. (صمت)
(منى يتغير سلوكها إلى عصبية ظاهرة ويتهدج صوتها ويبدو بوضوح أنها بالغة الاضطراب)
عبده : عندك مانع؟
منى : « بعصبية ظاهرة » وماقتلش ليه قبل كده؟ امبارح؟ أول امبارح؟
عبده : ادينى قلتك.. ممكن تتفضلى بقى..

منى : انفعلى ايه؟

عبيده : (فى مكر) قصدى ان كنتى عايزة تمشى يعنى..

منى : (تمثّل الرقة ولكن سلوكها لا يزال عصبياً) امشى،
امشى، فين (توتسم) انت موش كنت حاتكلمنى عن الدوا؟

عبيده : (قاهماً)أهها تريد الانتظار لترى فتحتى) يا منى يا
حبيبتي!

منى : اتكلم!

عبيده : أبداً.. زى مانتى عارضة.. التركيبة الاساسية ما اتغيرتش..
نفس تركيبة السم القديمة.. السم اللى -

منى : (صارخة) كفاية.. عارفة!

عبيده : لكن انا بقى أضفت عامل الزمن.. أضفت مواد بتتفاعل مع
السم وتحوله لعلاج بعد فترة زمنية معينة..

منى : (كأنما لنفسها) هو فتحتى جاى امتى؟

عبيده : (مستمراً) وده اللى ما خطرش لفتحتى أبداً..

منى : لازم نزل فى اوكاندة بقى بعد ماباع البيت..

عبيده : أمنيتى الوحيدة دلوقت انى أشوف وش فتحتى لما يقرأ

التركيبة.. أبص فى عينيه وانسى الدنيا كلها.. منى.. منى يا

حبيبتي.. أنا عشت السنين دى كلها فى عذاب.. عذاب طويل

وعميق.. كنت باشوف نفسى مجرد منفذ.. واحد بينفذ أفكار

فتحى.. معادلاته وتركيباته واختراعاته.. عمرى ما قدرت
أركب تركيبة خاصة بى أنا.. تركيبة تنتشر فى المجالات
العلمية وتحتها اسم الدكتور عبده عبد الباسط.. تركيبة
مستحيل يكون فكر فيها حد..

(فترة صمت)

تفتكرى حينهار لما يشوفها؟ والا حيفرح ويطير م الفرح؟
(مغيرا اللهجة) فتحى كان رايه ان عنصر الزمن يصعب
تخطيه.. وقال لى فى سويسرا فأكبره يا منى؟ - قبل ما
نتجوز! - قال لى ان أمنيته يعمل حاجة تتعارض فيها
الزمنة. فأكبره رحلتنا لشركة سيبا والأيام الحلوة اللى
قضيناها بين الجبال والبحيرات؟

(صمت)

خلاص.. الحلم انتهى.. القزازة اهى.. ادينى لحظة
واحدة وأنا أوريكى أزاى وصلت للمعابلة..

(يخرج من الباب الخلفى « العمل »)

منى : دا كابوس موش حلم! فتحى يرجع مصر؟ ليه؟ عشان الدوا
صحيح؟ يا ترى كبر قوى وشعره ابيض؟ لسه محتفظ بالـ
بالـ.. قطعاً! فتحى بيحاسب على نفسه ومنظم حياته
كويس.. (تضحك) عشر سنين! كبرنا وعقلنا! عنصر
الزمن! أما نكتة!

(تتحسس وجهها فى خوف ثم تخرج مرآة
تتأمل فيها وتضع بعض المساحيق سريعاً)
لا مش نكتة! لا.. موش هزأ..
(يدخل فتحي من أقصى اليمين)
(تنسمر فى مكانها حين تراه)

منى : فتحي!!

فتحي : (يهدوء) أزيك يا منى

منى : فتحي.. سجد الله بالسلمة..

فتحي : الله يسلمك.. فين عيده؟

منى : (فى حرج شديد) أزي الصحة..

فتحي : الحمد لله.. هو عيده موش هنا؟

منى : (فى نفس الحرج) أهلا وسهلاً.. كلنا كويسين.. انت.. انت
جيت لوحده؟

فتحي : فى الحقيقة.. أ..

منى : أصلها مفاجأة يعنى -

فتحي : انتى ماكتيش عارفه انى جاى دلوقت؟

منى : أه.. لا..

فتحي : أنا كنت متصور ان عيده قال لك.. وبصراحة كنت منتظر

أشوفك النهارده (متريدا) بس موش دلوقت يمكن..

منى : ماكنتش عايز تشوفنى؟

فتحي : انتي عارفه اني كنت عايز..

منى : عشر سنين ولا جواب ولا تليفون ولا -

فتحي : ازاي بقي؟

منى : لى أقصد..

فتحي : انا ايمما اكتب واتكلم .. اسألى عبده ..

منى : (فى حيرة) كنت بتكتب صحيح؟ والجوابات كات بتضيع
مثلا؟

فتحي : يمكن .. بس كان عبده بيرد على!

منى : موش ممكن .. انا باشوف كل جواباته .. لا لا لا .. انت

كذاب: (فى دلال) موش ممكن تكون لسه فاكرنى بعد

السنين دى كلها .. ع العموم الجوابات موش مهمة .. تكتب

ما تكتبش موش مهم!

المهم انك قدامى دلوقت (فى حيرة) وانا .. بعد السنين دى

كلها -

فتحي : (يحس بالحرج فيحاول تغيير الحديث) هو عبده راح

فين؟

منى : هنا..

فتحي : هنا فين؟

منى : ما اعرفش اجيب لك لون؟ طول عمرك تحب اللمون ..

فتحي : (يضحك) انتى فاكهه؟

منى : آهه.. فى الدولار.. زى ما يكون حد محضره مخصوص ..
عصير طبيعى وحتة سكر واحدة..

فتحي : ماتتعبيش نفسك..

منى : دا جاهز..

(تقدم له شراب الليمون)

فتحي : مرسى قوى .. طعمه بقى غريب على ..

منى : مر شويه.. مابقتش تحبه؟

فتحي : (يشرب) بالعكس ! مابقتش الاقيه!

منى : مافيش لون فى بلاد بره؟

فتحي : فيه طبعا كتير.. بس اصله زى ماتقولى بيفكرنى بحاجات
باحاول انسأها..

منى : (فى سعادة وترقب) بيفكرك بايه؟

فتحي : مالوش لزوم بقى!

منى : (تقترب منه وتركز على وجهه) نسيتهنى خلاص
يافتحي؟

فتحي : (فى إحراج شديد) منى.. أرجوكى..

منسى : كانت سحابة صيف وراحت! صيف ورا صيف ورا صيف
ورا صيف... عيشة سائح! (عندما تشرق في فقس
الإحسان) أراى الواحد ساكن يفرق حياة مايا القيش الحلم
بتاعة؟ يلاشيه انتهى .. هرب!

فتحي : ماكنش حلم يامنى..

منسى : (في إثارة) كان حقيقة يا فتحي! كنت بتحبنى صحيح؟

فتحي : «كذبة»؟

منسى : كنت وأسه.. وحتفضل على طول تحبنى.. قول .. قول لى
يا فتحي..

فتحي : (في حرج رهيب) لزومه ايه بس يامنى؟ احنا..

منسى : لا .. ماكيرناش.. أسه صغيرين.. وأسسه بعشنى ع النبل
ولسه بنشرب لون.. (فجأة) فتحي حبيبي.. ليه سبتنا
الستين دى كلها؟

فتحي : موش أنا اللي سبتكو..

منسى : أنت هريت!

فتحي : دوش أنا اللي هريت!

منسى : أنت هاجرت..

فتحي : انتى اتجوزتى عبده.. اللي بيدبك.. ويتحبيه..

(صمت - تدور حول نفسها ثم تقف)

بعيدا عنه ثم تخفض بصرها وتهمس)

منى : دا صحيح..

فتحى : عشر سنين.. عشر سنين بينا.. بحر واسع كبير..

منى : وفى لحظة بقينا سوا.. (فى انفعال مفاجيء) فتحى ..
ماتسيناش احنا بنحك وعائزيناك .. فتحى .. احنا -

فتحى : (مقاطعا) احنا؟ انتو مين؟ انتى يا منى؟ ولا انتو؟ أنا كمان
يا منى بحبكم.. باعبيكم.. قبل ماخبيتك يا منى حبيت عبده..
حبيته صحيح.. علاقتنا ماكانتش صداقة وماكانش ممكن
تبقي صداقة.. الصداقة دى حجة البليد .. (يضحك) حجة
اللى ماقدرش يحب..

منى : عارفة اللى بينكو ..

فتحى : موش ممكن.. وعمرك ما حتعرفى.. احنا لما حبيتنا بعض
حبنا كان نبع صافى.. نور ماعرفش بيبجى منين ولا بيروح
فين.. شمس كبيرة بتنور الكون كله.. ووسط الشمس دى..
فى المركز بالضبط كان عبده!

منى : انت بتقول الكلام ده ليه

فتحى : (يهدأ) صحيح! مالوش لزوم..

(يتجول فى المكتب - يرى الجرس - يعيث بالاوراق ثم يعود
لمواجهتها فيرى فى عينيها نظرات دهشة - كأنما لم تكن

تتوقع منه الانفعال - يجلس ثم يقف.. ثم يركز نظره عليها -
ويواجهها في دفه)

منى : أنا زعلتك يا فتحي؟

فتحي : موش ممكن.. انت صغيرة يا منى.. كان نفسى تعرفى
الكلام ده من زمان.. كان نفسى تفهمى انك يوم ما حبيتينى
كنتى: بتحبي فى عبده.. عبده اللى عايش جوای!

منى : أنا حبيتك انت يا فتحي -

فتحي : (كريشندو) فى اللحظة اللى حبيتينى فيها .. كان عبده
جواى .. عايش جوای وما اقدرش اتخلص منه .. (حائرا)
أشرح لك ازاي؟ ليه موش عايزه تفهمينى؟

منى : ليه انت موش عايز تفهمينى؟ (انفعال شديد) أنا حبيتك
انت يا فتحي ! صدقنى .. اتعذبت وسهرت وانهرت وكنت
حانتحر عشانك.. كنت باشوف الدنيا بعينيك.. باقرا
بلسانك.. بافكر بعقلك.. كنت الحياة بالنسبة لى (تبكى)
ولسه زى زمان -

فتحي : عشان خاطرى ما تعيطيش.. امسحى دموعك.. (يربت على
كتفها ويمسح دموعها) أنا كنت زيك بالضبط.. كنت فاكتر
ان حبنا عالم كبير.. عالم مستقل من النور والامل.. لحد
اليوم اياه.. يمكن ما انتيش فاكراه .. لكن دى الحقيقة ..
يوم ماطلعنا الجبل فى سويسرا .. فاكراه يامننى ؟

منى : (فى زهول) فاكدة يا فتى ..

فتى : اعترفتى لى بحبك يومها .. ومشينا احنا الثلاثة بعد الغروب
زى ماتكون ما شيين فى السحاب .. وفجأة التفت ولقيت
الدموع فى عينيكى .. ماكنتش دموع فرح ولا كانت دموع
حزن .. كانت دموع طيعية صافية زى دموع السما من
حوالينا .. كنتى خايفة على عبده وماسكه فى ذراعه زى ما
يكون أمل حيصيح منك .. كنتى يتحضنيه وانتى موش
دارية .. كان فيه حاجة جواكى بتقول ان عبده هو إبني
الصغير اللى محتاج لى وموش ممكن ابتعد عنه .. كان قلبك
بيتلوى م الخوف .. وفجأة .. بصيتى للسفح البعيد
وارتعتت ايديكى وكل جسمك ..

(صمت)

لا .. ماكنتيش خايفة م السفح ولا الوادى ولا الضلعة ..
كنتى خايفة م اللحظة المحتومة .. اللحظة اللى ممكن تبعذك
عن عبده ..

(صمت)

ساعتها .. زى ماتكون السحابة اللى مشيت عليها وعشت
فيها راحت عن عيني .. بصيت لك وعرفت انك طول الوقت
كنتى بتحبي عبده .. عبده اللى أنا شايه جواى .. ولما شفقيه
كان فات الأوان واعترفتلى أنا بحبك .. وساعتها كمان قررت
ما اضحيش بعبده وييكى عشان سعادة وهمية .. لكن فضلت
أحبك ..

منى : ولسه بتحبينى..

فتحنى : عشان بحب عبده

منى : وأنا؟

فتحنى : المشكلة يا منى انه كان لازم عبده يحبك لانى حبيتك.. وكان لازم تحبينى انتى لآنك بتحبى عبده!

منى : انت بتقول الغاز..

فتحنى : وعشان كده قررت أكسر الدائرة اللعينة اللى جمعتنا وأهاجر..

منى : لكن أنا بحبك يا فتحنى.. صدقنى.. بحبك صحيح!

فتحنى : وعنده؟

منى : ماله عبده؟

فتحنى : عبده اللى جواى!

منى : عارفه.. (فى ثقة وتحدى) عارفة كل حاجة.. وما فيش داعى تعمل مسرحية كبيرة عريضة من عبده.. لانتو أول أصدقاء بيحبوا بعض ولا آخر أصدقاء حيحبوا بعض.. (فى دفعه) وتأكد ان عمرى ما صدقت الكلام اللى كان بيتقال عنكو فى الشركة.. طول عمرى وأثقة انه ما فيش حاجة بينكو

فتحنى : (ينخرط فى الضحك) حلوه ما فيش حاجة دى!! علاقة

غير طبيعية يعنى؟ طبعاً لا! ومع ذلك فبرضه علاقتنا غير طبيعية! ياريت تقدرى تسمعينى ولو مرة يا منى.. أنا وعبدى عمرنا ما افترقنا عن بعض.. من الابتدائى للجامعة.. حتى بعد التخرج كان لازم نشتغل فى حته واحده.. فى شركة أدوية واحدة ومعمل أبحاث واحد.. ما كانش ممكن ننفصل.. ما فيش فكرة خطرت لى إلا وكانت مهرجان من السعادة عندى وعنده.. ما فيش معادلة جديدة ولا تركيبة عبقرية إلا عشناها سوا واحتفلنا بيها أيام وليالى..

منى : فاهمة يا فتحى!

فتحى : موش ممكن.. أنا نفسى مش؟ فاهم العلاقة لحد الوقت.. لكن يوم ماجات البعثة (فى حماس ورهبة) كنا زى ما نكون دخلنا معبد يونانى قديم.. صالة كبيرة طولها كيلو وعرضها كيلو وسقفها عالى للسما. والهمسة فيها لها صدى مخيف.. حسيت بوحشة وارتباك.. التفت حولى مالقيتش عبده..

منى : اتخلى عنك؟

فتحى : كان المرشح الاول للبعثة – وأصر انه يتنازل لى.. القوانين واللوائح والدنيا كلها كات ضده.. فضل يحارب لحد ما نجح.

منى : « نجح » بنقول؟

فتحى : نجح فى انه يخلينى أنا أنجح.. شاف نجاحى ونجاحه فى.. ضحى بالبعثة عشانى أنا..

منى : ومع ذلك أول مارجعت م البعثة.. هاجرت!
فتحى : (يضحك) انتى عارفه ان الوظيفة بره كات جايه له هو؟
منى : ضحى بيها كمان عشانك؟
فتحى : كافح كفاح المستميت عشان يخلينى أنا أسافر..
(صمت)
منى : موش عارفة دا ممكن يغير ايه فى الموضوع..
فتحى : ما فيش حاجة لازم تتغير (فى هدوء تام) أنا سعيد اللى
قتلتك الكلام ده دلوقت يامننى.. مين عارف بكره مخبى لنا
ايه.. حبنا ماكانش حلم.. بس فيه حقايق زى الأحلام..
منى : ولازم ننساها؟
فتحى : مااعرفش ..
منى : لازم انسى أنا .. زى انت مانسيت؟
فتحى : لازم تحاولى..
منى : (ثائرة) كداب.. كداب.. كداب.. انت عمرك مانسيت منى!
وعمرك مااحتساها..
(تهجم عليه وتضربه بقبضتيها فى
دلال ثم تحتضنه وتقبله قبلة طويلة
يشاركها فيها أول الأمر ثم - أثناء
مسح دموعها - يدخل عبده من الخلف)

عبدہ : (متجاهلاً ما يرى) فتحي حبيبي ! ازيك ياراجل ..
وصلت امتي ؟

فتحي : عبدہ حبيبي!

عبدہ : ايه التأخير ده ياعم ؟ انا باستناك م الصبح !

فتحي : لا أبداً .. دنا .. (فى حرج) انا أصلى ..

عبدہ : طبعاً ياعم.. لازم تزور زوزو ومجدي وكل الحبايب..

فتحي : (نفس الحرج) بالعكس .. دنا..

عبدہ : الله ! انت ما حدش قدم لك حاجة والا ايه؟

فتحي : مرسى قوى .. شريت لمون!

عبدہ : تحب حاجة ثانية؟

منى : (تتظاهر بان شيئاً لم يحدث) انا قدمت له اللمون اللي
فى الدورق!

عبدہ : (ينتبه إلى وجودها) انتى لسه هنا يا منى ؟

منى : (تنظر إليهما فى غضب ثم تتجه إلى باب الخروج
وتخرج) باى باى!

عبدہ : ودلوقت بقى أوريك الانتصار الكبير.. حضرت عشر قرايز
على الأقل..

فتحي : طول عمرك سريع!

عبدہ : الأهم من ده التركيبه..

فتحى : وطول عمرك عفريت فى الرياضة!
عبده : قول لى الأول.. أخبار بلاد بره ايه؟ عادل كويس وسها؟
ياترى استريحت هناك؟
فتحى : الحمد لله.. كلنا كويسين..
عبده : والشركة ؟ لازم منغفيناك ياعم!
فتحى : يعنى .. ماشية!
عبده : ماشيه بس؟ دى لازم بتجرى (يضحك)
فتحى : دا الدوا اللى قتلنى عليه فى آخر جواب؟
عبده : (فجأة يفقد الحماس ويفتر عزمه - ويبتعد - ينظر
إلى فتحى - يضع يديه حول راسه ثم يتقدم من
فتحى فى تردد قبل أن يتكلم)
شوف يا فتحى .. اسمع الحكاية موش حكاية دوا
فتحى : (فى حيرة) موش فاهم..
عبده : (صارخا) حتفههم ازاي بس؟!
فتحى : سلامتك يا عبده.. انت كويس؟
(صمت مشوب بتوتر رهيب يدور أثناءه
عبده على المسرح كأنه هو ثور مربوط
فى ساقية ثم يقف فجأة أمام فتحى
كانما لينازله)

عبيده : أنا بعث لك فتحي عثمان أتكلم!

(صهده)

فتحي : عثمان ليه؟

عبيده : (في قوذه وثمان) عثمان أضع هذه العلاقة الخريبة بي اللي
استمررت سنين وسنين .. وشوش ممكن تستمر بعد كده ..
وأحد مننا لازم يموت!

فتحي : (مضطربا ببعض الشيء) أؤكد لك اني عمرين ماخنتك مع
منى .. الوضوح ومانيه -

عبيده : أنا مايتكلمش على منى ..

فتحي : من ناصيتي أنا ...

عبيده : ماتنا طافئيش أرجوك ..

فتحي : انت اعصابك -

عبيده : اعصابي كويسه أرجوك اسمعني .. الكلام اللي يقوله لك
فكرت فيه أيام وشهور وسنين .. احنا اصدقاء من امتي ..
تقدر تقررللي؟

فتحي : طول عمرنا ..

عبيده : اصدقاء؟

فتحي : حبايب

عبيده : أكثر من حبايب؟

فتحى : يعنى ايه؟

عبيده : يعنى حبايب أكثر من اللازم مثلاً؟

فتحى : ازاي بقى ؟

عبيده : يعنى (صمت) أعداء ؟

فتحى : لا لا لا .. عبيده .. انت قطعاً موش طبيعى النهارده..

عبيده : (فى هدوء غير متوقع كأنما هو استسلام للقدر) أنا
عمري ما كنت طبيعى زى النهارده .. عمري ما قدرت أتحكم
فى أعصابى وأتمالك نفسى زى النهارده..

فتحى : تتمالك نفسك على ايه؟ المسألة فيها سوء تفاهم منى كانت
بتعيط وأنا -

عبيده : عارف .. سمعت اللي قلتوه

فتحى : سمعت؟

عبيده : وشفت..

فتحى : أنا أؤكد لك -

عبيده : وأنا مصدقك .. منى دى مسألة جانبية.. عرض من أعراض
المرض .. موش المرض نفسه..

فتحى : مرض ايه يا عبيده؟ أنت بتقول ايه بس؟

عبيده : المرض يا فتحى .. المرض هو احنا .. العلاقة اللي اندفعنا

فيها بحماس أعني.. بجنون مالوش مبرر وعمره ماكان له
مبرر .. أرجوك .. اسمعني..

فتحي : يا عبده انت بتخرف..

عبده : (فجأة) تقدر تنكر أنك حاسس بالذنب من ناحيتي؟

فتحي : حاسس بالذنب أنا؟

عبده : يعني حاسس مثلاً اني كنت أبيل منك .. حيث عشائك
بحاجات معينة ماقدرتش أنت - أو مارضتش تديني قس؟

فتحي : يا عبده احنا حبايب.. ولايمكن بين الـ

عبده : احساسك بالذنب الحقيقي .. احساسك بانى نبيل.. بانى
وإنى وإنى .. (يضحك) إحساس غير طبعي ! وما دام
متصور ان المسألة خاصة بمعنى أبداً بيها .. (صمت) اللحظة
الوحيدة اللى حسيت بانك نبيل ويتضحى عشائى كانت فى
سويسرا.. تمام؟

فتحي : أنا ماضحيتش بالمعنى المفهوم.. انتو طول عمركو لبعض..

عبده : صحيح؟ خلىنى أفكر.. احنا لما رحنا سويسرا كان حلمنا
ايه؟ نتجوز؟ نحب؟ أبداً.. كنا عايزين نجيب عقد توريد يثبت
إننا هنا.. فى الشركة العربية للأدوية.. نقدر ننافس بلاد بره
منى جات معنا ليه؟

فتحي : مش منى بس -

عبده : الإداريين والبنات جم معنا ليه؟ ماتقوليش لزوم الإدارة أنا

وانت وغيرنا كنا عايزينهم يتفلسفوا ويغطوا على عملية
العقد...

فتحى : لا لا لا .. دا تزييف للحقيقة..

عبده : (مستمرًا ومتجاهلاً إياه) ومنى بالذات جات معنا ليه؟
كنا صحيح عايزين سكرتيرة ؟

فتحى : طبعًا!

عبده : فتحى حبيبى.. كفاية كذب! احنا خذناها عشان نشوف مين
فيتا يقدر ياكلها -

فتحى : (صارخًا) عبده! أنا ما اسمحكش -

عبده : (فى خجل) معلش .. كلمة طلعت أوت!

فتحى : أنا ما بانكرش انه كان فيه بينا كنا استلطاف.. وفعلًا
رشحناها - إلى حد ما - يعنى - إلى درجة معينة ..

عبده : جميل ! وبعدين اكتشفت انها بتدبك أو انك بتحبها .. حاجة
كده!

فتحى : انت عارف انها كانت بتحبك انت..

عبده : موش بالأسبوط..

فتحى : دى الحقيقة.. يوم الجبل -

عبده : يوم الجبل الجميل اللي عمال تشعرو عليه كان وهم .. انت

عارف ليه حطت ايدها فى أيدي وحضنتنى وأحنا نازلين؟

عارف ليه سابك ورمت نفسها على؟ فإكر حصل ايه ليلتها؟

فتحى : فاكّر.. قضينا الصباحية فى التلج واتغدنا فى كشك الحارس والمغرب

عبده : لا .. قبل المغرب.. العصر.. كنا فى ساعة العصر؟

فتحى : كنا مع بعض طبعاً..

عبده : لا .. أنا كنت معاها لوحدنا .. (فى لهجة التاكيد) لوحدنا خالص..

فتحى : مش فاكّر دى ..

عبده : طبعاً.. لأنك نمت ثلاث ساعات فى أوتيل بيانكو.. دى كانت البداية والنهاية.. ماحسيتش بيها الا واحنا مروحين .. فكرت فى اللى عملته وانكشف لى الطريق الطويل اللى قطعناه سوا.. لكن - أه - ماقتلكش عملنا ايه؟ بعد الغدا على طول شفت الحقيقة لأول مرة.. عرفت انكو بتحبوا بعض حب حقيقى لايمكن يموت.. نظراتكم.. كلامكم.. سلوككم.. كل حاجة بينكو كانت بتقول ان منى خلاص .. بقت بتاعتك..

فتحى : أنا متأسف.. لازم أقاطعك.. لازم أوضّح -

عبده : كل حاجة واضحة يا فتحى .. المسألة ماكانش فيها شك - حسيت انى خلاص..

(صمت - يدور حول نفسه - ثم يقترب من مقدمة المسرح ويتحدث كأنه يخاطب نفسه)

ماكانش إحساس بالهزيمة .. ولا بالغيرة .. أبدا .. كنت
باحس لأول مرة فى حياتى بإنى ضعيف .. بإنى -
ماتستغريش - وحيد ..

(صمت) (يتجه إلى فتحى ويركز بصره عليه)

احنا اشتركنا طول عمرنا فى كل حاجة .. عمرنا ماحسينا
بإن فيه حاجة ممكن تفصل بينا .. منى كانت الحاجة ..
الرمز .. اللى خلاتنى أحسن انى واقف لوحدى بانفراج
عليكو .. زى ماقلتك .. ماكانتش غيرة اطلاقا .. لا كنت غاير
منها إنها حتاخذك .. ولا غاير منك انك حتاخذها .. لسبب
بسيط .. لانى كنت عارف انك موش ممكن ترتبط بيها
رسمى!

فتحى : انت برجلتنى خالص يا عبده .. حكاية قديمة بالشكل ده -
عبده : ومع ذلك حية فى نهنى وفى قلبى .. وفى حياتى ؟ طبعاً ..
دى حياتى نفسها ..

فتحى : وبعدين؟

عبده : خلاص ..

فتحى : (متريدا) كنت بتقول عملتوا ايه .. يعنى .. بعد الضهور؟

عبده : خطبتها!

فتحى : موش معقول!

عبده : (يضحك فى مرارة) سلاح جبان! لكن ماكانش عندى
غيره! كنت عارف ان منى ما تقدرش تقاوم إغراء الجواز
منى او منك.. (صمت) وكنت عارف انك موش ممكن
تخارينى بنفس السلاح! (يضحك) احنا عارفين بعض
كويس.. اكثر م اللازم يمكن..

فتحى : وافرض.. افرض.. (فى قلق شديد) كل ده مالوش علاقة
بصداقتنا..

عبده : قصدك بحبنا!

فتحى : أرجوك يا عبده.. اهدأ شوية..

عبده : قلت لك انا هادى جدا.. عملية منى دى كات مجرد زى ما
تقول - فتحت عينى ع الحقيقة.. واحنا نازلين ع الجبل وهى
حاضناتى.. كان عندى إحساس غريب بالوحشة.. نوع من
الوحدة اللى بتولده الخيانة.. حسيت ان بينى وبينك لأول مرة
سر كبير.. وادى فاتح بقه وممكن يبلىع الكون كله - لأول مرة
كان فيه حاجة ما قدرش اقول لك عليها.. ولأول مرة ان فيه
واحدة.. منى.. اللى انت حبيتها وحبتك.. كانت مستعدة
ترميك عشان تتجوز.. العلاقة اللى بينا.. احنا الثلاثة كات
وصلت للنقطة الحرجة.. نقطة البداية والنهاية.. أو بداية
النهاية.. وعشان كده لازم تموت يا فتحى..

فتحى : (فى رعب) يا عبده كفاية الكلام ده.. خلىنا نرجع للدوا..

عبده : انت ليه موش عايز تواجه الموت بشجاعة؟

فتحي : موت ايه بس اللي بتتكلم عليه بالطريقة دي؟

(ينهض ويتأمل خارج المكتب وينظر إلى الابواب)

عبده : اقعد استريح.. أنا موش حاقتلك بسكينة ولا مسدس!

(يضحك) بالدوا!

فتحي : (يضحك ضحكة صفراء ليذهب عن نفسه الخوف)

موت معنوى؟! هاهاها!

عبده : لا.. وموت جسدى كمان.. اطمئن.. الموت المعنوى أنا مته من

زمان.. مته لما عشت سنين معاك اللعب دور الرفيق الذكى

الشاطر وأنا عارف انى فى الحقيقة مجرد منفذ..

فتحي : (يستجمع شجاعته ويقوم ليتحدث وهو يفحص

مخارج المكتب بطرف عينه) لا لا لا.. اسمح لى بقى..

انت طول عمرك بارع وعبقرى.. وأنا دايمًا.. طول عمرى..

معجب بذكائك ومهارتك.. طول عمرك.. الناس عارفه

وتشهد.. طول عمرك وأنا (يجف حلقه)

(يسيطر عليه الرعب إلى درجة تحشرج

صوته واختناقه وعدم وضوح الكلمات)

أنا دايمًا.. ياتغنى.. بأمجادك!

عبده : خلصت الخطبة؟

فتحى : خطبة ايه؟ (ينهار تماما) أنا.. باتكلم.. جدا!

عبده : موش عيب ان الإنسان يكون ضعيف.. موش عيب انه ما يكونش عبقري العيب انه يخبى ضعفه بضعف أكبر.. يعنى يحتمى بواحد قوى..

فتحى : قصدك.. أنا؟

عبده : أنا عشت فى الضعف ده سنين وسنين.. عايز أصدق إنى على شىء وموش قادر.. لأنك انت كنت على شىء أكبر.. ويوم ما خطبت منى.. قررت إنى أنهى الخداع ده..

فتحى : (عاد إليه بعض الاطمئنان نتيجة لتغير أنغام كلمات عبده) دا كان من زمان يا عبده.. من زمان قوى.. (يضطر نفسه إلى الضحك) كنا عيال بقى و.. وكبرنا!

عبده : (مستمرًا دون التفات إليه) بعدتك عن طريقى بكل وسيلة ممكنة.. عطيتك البعثة..

فتحى : أنا ما قدرش أنكر –

عبده : ولما رجعت كافحت عشان ابعذك تانى.. وديتك بره (ثائراً) انت ليه موش عايز تفهم.. كان لازم اقف لوحدى.. كان لازم اثبت انى أقدر أعمل حاجة.. (صارخاً) لوحدى! (فى هدوء) ولو حاجة صغيرة..

فتحى : وادبك نجحت.. تركيبة الدوا نجحت.. موش كده؟

عبده : (فى تشف) غصب عنك!

فتحى : الحمد لله.. مبروك.. ألف مبروك..

(يضحك محاولاً إزالة التوتر والعودة إلى الحالة الطبيعية)

موش تورينى التركيبه بقى؟ خلينا نتكلم فى المفيد آمال..
يالله ياعبدہ خلينا نفرح..

عبدہ : سهرت لىالى.. دبحت نفسى.. كنت باكلم نفسى فى الشارع لحد ما وصلت للدوا الجديد..

فتحى : اهو كده الكلام.. موش تقول لى موت.. وحياة (يضحك)

عبدہ : (شاردا) موت ايه؟

فتحى : يعنى! (فى دعر) اقول لك الحق انت خوفتنى فعلاً!

عبدہ : ا... موتك انت يعنى!؟

فتحى : كان هزار.. (يضحك) هزار تقيل!

عبدہ : لا أبدا..

فتحى : أبدا ازاي؟

عبدہ : انت موش شربت اللمون؟

فتحى : (كانما لدغه عقرب) اللمون اللى منى.. يا نهار مش فايت

عبدہ : مفعوله ياخذ ساعة!

فتحى : وأنا اقول طعمه غريب ليه!!

عبده : المهم انى دلوقت أقدر أوريك التركيبة..

فتحى : يا عبده (فى شبيهه بكاء) ما فيش حاجة مضادة.. ما عندكش حاجة -

عبده : خلاص.. لازم اعترف لك.. العذاب بتاعى يا فتحى يا صاحبي كان لازم ينتهى.. كان لازم اتخلص من وجود فتحى اللي كان راكبنى زى العفريت.. رحت البعثة وپرضه كنت معاى.. رحت بلاد بره وپرضه وراى وقدامى وفى كل مكان.. وحتى فى التركيبة دى! (ينهار) ماحدش سامعنا ولازم اعترف لك.. التركيبة دى.. هى اللي انت عملتها بالضبط !

(صمت)

فتحى : (فى ذهول) مش فاهم..

عبده : (فى انهيار) انت بتواجه انسان مهزوم.. انسان ماقدرش ينجح بعد الكفاح.. بعد الجحيم اللي عاشه سنين وسنين.. ماقدرش يعمل تركيبة واحدة جديدة.. وحتى التركيبة اللي عملها وخرج بيها ع الدنيا طلعت تركيبة صاحبه ..

فتحى : (فى ذهول) ما عدتش فاهم حاجة أبداً -

عبده : وعشان كده لازم تبعد من طريقى.. تخرج من حياتى.. لازم الناس تقول دوا عبده.. وتركيبة عبده.. موش تنفيذ ولا بيع ولا توزيع عبده! فاهم.. (فى إصرار) يعنى أنا باسرق

تركيبك... وبادعى إن أنا غيرتها..إن أنا أضفت لها عنصر
الزمن! (يضحك) وما فيش حد فى الدنيا يعرف الحقيقة
غيرنا.. وبعد (ينظر فى ساعته) ١٥ دقيقة.. ماحدش
حيكون عارف الحقيقة .. إلا أنا بس !

فتحى : (فى ذهول وقد بدأت علامات الألم تظهر على وجهه)
موش ممكن موش ممكن.. دا كابوس مخيف..

عبيده : كان كابوس مخيف .. وماعاش.. ماعادش ممكن يرجع
تانى بعد النهارده.. كان لازم تخرج من حياتى.. ومن حياة
منى.. من حياتنا احنا الاثنين.

فتحى : (الألم يزداد والكلمات تخرج بصعوبة) أنا مظلوم فى
منى ..

عبيده : الموضوع ماعادش فيه ظالم ولا مظلوم.. تعرف يافتحى ان
أنا ومنى مانقدرش نتكلم على حد غيرك؟! تعرف أنها لما
بتحلم بتنادى على فتحى ؟ تعرف إنى لما بابوسها بتدور من
غير ماتشعر عالحننة اللى فى رقبتك انت ؟ !

فتحى : موش معقول.. موش معقول..

عبيده : طبعا موش معقول ! وعلشان كده لازم ينتهى ..

(يقدم إليه ورقة) أدى التركيبة الجديدة .. فاكرها ؟! هى
اللى حضرتها لى قبل ماتسافر بيومين وقلت لى موش
حتنفع .. (يضحك) أهى نفعت !! اتفضل.. اتفرج..

فتحى : (يمسك الورقة بإيد مرتعشة - يقرأ - يطوي الورقة
ويتجه إلى عبده فى ذهول ثم يضحك ضحكة صفراء
هستيرية قبل أن يتحدث)

هى ده التركية اللى قتلتنى عشانها؟

عبده : انت عارف انتصارى حجه ايه؟ جربتها بنجاح على الفيران
والكلاب .. ونجحت على كل كائن حى .. (فى همس)
وجربتها على ناس مايعرفوش السر .. ونجحت!

فتحى : الله يرحمهم!

عبده : بالعكس .. دول أصحاء وزى البمب!

فتحى : ثلاثة أشهر !

عبده : انت بتخرف تقول ايه؟

فتحى : اسمعنى يا عبده لحظة ! (فى حماس يخالطه الالم) أنا
بقى لى سنين باشتغل ع التركية دى نفسها .. يمكن توارد
خواطر .. ويمكن لاننا بنفكر زى بعض (فى ألم شديد) أنا
حاموت بعد دقايق .. لكن لازم أقول لك آخر أبحاثى فى
الموضوع ده .. التركية دى قاتلة ولايمكن تشفى حد أبدا ..

عبده : أنا جربتها بقول لك .. جربتها بنجاح!

فتحى : بس احنا موش فيران ولا ققط ..

عبده : والناس ..

فتحى : حيموتوا بعد ثلاثة أشهر ..

عبده : مستحيل !

فتحى : عنصر الزمن اللى بتحكى عنه عكسى .. يعنى التركيبية
تشفى فى لحظة وتقتل على مهلها .. السم اللى فيها
مابيتكونش إلا بعنصر الزمن .. (صارخا) ليه ماكتبتليش
عنها ؟! ليه ماقتليش يا عبده ؟!

عبده : أنت مجنون!

فتحى : اقرأ العدد ٣٢ من المجلة الطبية العربية ! (منهارا) أنا
برضه قتلت ناس بيه .. ويمكن حاخذ جزائى النهارده! (فى
دفع العاطفة) أنا موش عايز أسيب لك شبح يا عبده ..
أرجوك .. اقرأ المقال بتاعى فى المجلة الطبية وعيد النظر
.. أنت اتسرعت .. اتسرعت قوى .. (يعتصره الألم) مين
يقدر يعرف معنى حياته ومماته؟! مين يقدر يعرف معنى حبه
وكراميته.. (فى ألم شديد) كل ده من الحب والا ..

عبده : (ينقض عليه ويحتضنه ويقبله بعنف) من الحب
الحب.. موش ممكن يكون غير حب ..

فتحى : عبده .. ياأعز صديق لى ..

عبده : فتحى .. ياأحب إنسان .. ياأجمل إنسان ..

(يتعانقان - تدخل منى فجأة)

منى : أنا خلصت مواعيدى وجيت - موش مفاجأة حلوة ؟! شوف

يافتحى انت لازم تتغدى معانا النهارده..

فتحى : (يتمالك نفسه) طبعا طبعا ..

منى : لازم تمسك فيه ياعبده .. اوعى تخليه يهرب زى عوايده ..

عبده : (مرددا فى وجوم) موش ممكن يهرب ..

منى : قدا ايه كنت باحلم باللحظة دى .. كلنا سوا من جديد ..

حنخرج بعد الغدا طبعا نروح المقطم .. موش كده ياعبده؟

وعارف .. عامله لكم حطة مفاجأة لايمكن تتصورها .. موش

حاقولكم عليها طبعا! آمال هى مفاجأة ليه؟ وبعد العصر

حنمشى فى الجبل لوحدنا .. احنا الثلاثة .. تمام زى

سويسرا.. احنا الثلاثة .. نمسك ايدينا فى ايدين بعض ..

وننزل الوادى الغويط .. (تضحك) وادى الموت ! أما حطة

اسم!! حقهم يسموه وادى الحياة !ايه رايك يافتحى ؟

(صمت - يبدو فتحى كمن اغفا

واستغرق فى نوم عميق - ينظر إليه

وإليها وتنحدر الدموع على خديه)

خلاص .. (تهمس لعبده) موش حنخليه يسافر

المره دى؟ مافيش قوة فى الأرض تقدر تفرقنا عن

بعض بعد النهارده !

ستار سريع

1

2

3

4

5

6

7

8

9

10

11

12

13

14

15

16

17

18

19

20

21

22

23

24

25

26

27

28

29

30

31

32

33

34

35

36

37

38

39

40

41

42

43

44

45

46

47

48

49

50

51

52

53

54

55

56

57

58

59

60

61

62

63

64

65

66

67

68

69

70

71

72

73

74

75

76

77

78

79

80

81

82

83

84

85

86

87

88

89

90

91

92

93

94

95

96

97

98

99

100

البحيرة

- **المظهر:** منزل مصرى مرتب ونظيف الصالة تشغل وسط المسرح وحوله أبواب وقطاعات من غرف النوم والشرفة والمطبخ خزانة كتب فى الخلفية ودولاب معلق، إلى أقصى اليمين باب يؤدي إلى الشارع
- **الوقت:** صباح يوم من أيام الصيف
- **الشخصيات :** حنفى
هنا
فوزى

(عندما ترفع الستار يدخل حنفى من أقصى اليسار خارجا من غرفة النوم ويصفر لحنا جادا. منظره سعيد رغم ملامحه الجادة. سمين وفى الأربعين تقريبا. يتجول بعينه فى الشقة ويتقدم من الأنتريه فيزيل ما يتصور أنه تراب من مسند الأريكة . يدخل إلى المطبخ ويخرج حاملا صينية عليها طقم شاي وكوب واحد يضعها على مائدة فى الوسط. يحضر قلما وورقة ويبدأ الحديث).

حنفى : مش بطل .. كل حاجة رجعت زى ماكانت.. كانوا فاكيرينى كروديا (يتمطى) لكن أهم خدوا درس مش حينسوه! عشان ماحدث بيجى تانى ويلخبط لى مشروعاتى ..

(يرن جرس تليفون مكتوم فيهرع إلى الدولاب فيفتحه ويخرج التليفون ويبدأ الحديث)

ألوه .. أهلا .. ازيك يافوزى .. لا .. نقدر نتكلم بحرية.. ا مشيوا كلهم أصلك مش واخذ بالك .. دول ناس من أياهم.. قرايبى صحيح لكن م النوع اللى دايما أحكيك عنه.. أيوه أيوه .. تصدق ان من ساعة مامشيوا وأنا عمال أفكر فى رواية جديدة ! عنهم طبعاً .. مجموعة من الناس مافيش حاجة فى حياتهم إلا الفلوس والجواز والعيال والـ .. ايه؟ أبداً .. ميراث ايه ؟! دا كلهم فدانين موزعين على بيجى خمسين نفر .. ودا اللى خلانى أتنازل

لهم عن نصيبى وأطراهم .. آه تمام .. كان لازم استعمل
الحزم .. طبعاً .. عارف لو طأوعتهم كان زمانى النهارده
فى مصر أو زمانهم معاً هنا .. وساعتها يا صاحبى
بقى .. خلاص ! أبقي انتهيت .. طبعاً .. ما أنا فاهمهم ..
أول ما ارضى أتحرك من بيتى واسايرهم الاقى نفسى
رسيه من غير ما أشعر على شط بحيرة الياش .. (يضحك)
أتجوز وأخلف وأحوش عشان اربى العيال وأقلق عليهم
وانت عارف الباقي .. لا لا .. ما اتخافش على .. أصل مش
ممكن يدمر الإنسان إلا المرأة .. آيه ؟ آه .. هى اللى
اخترعت بحيرة الياش .. تغرى الرجل وتجذبه وتصور له
حياة زى الجنة ويعدين يلاقى نفسه عبد لها .. عبد بقولك ..
عايش فى خيمة جميلة على شط البحيرة وحواليه آلاف
العيال والـ لا لا .. والله مش مبالغه .. (يضحك) لسه ..
باقول لك لسه ما شربتش الشاي! طيب بس ادينى فرصة ..
ساعة كده ؟ ولا اسمع .. ما تيجى انت .. آ .. دلوقت ..
أصل مش معقول نناقش الموضوع ع التلفون .. وهو
كذلك .. منتظرك .. باي باي ..

(يضع السماعة ويعيد التلفون إلى مكانه -

يعود إلى المنضدة)

طب وإليه ما ادخلش التجربة الأخيرة دى فى الكتاب
اللى فى ايدى ده يعنى ممكن .. ممكن أخليها فصل

مستقل.. أخلق شخصية راجل مؤمن برسالة معينة صمم
على مقاطعة الجنس الآخر.. وأبين الأسباب والدوافع ..
واكتب عن الهنا والسعادة اللى عايش فيها وعمله المنتظم
وذكائه إلى آخره .. واركز على الهدف اللى رسمه
لحياته .. ولأزم يكون طبعاً هدف عظيم .. يعنى مش
ضرورى يكون مدرس زى ولا حاجة .. ممكن
أخليه ناظر.. (يضحك) الناظر يمكن يزعل .. (جاداً)
بالعكس ممكن يفرح بتمجيد صورته فى الكتاب.. وفى
الحالة دى يبقى الهدف خدمة البشرية جمعاء عن طريق
التعليم.. وفى وسط العملية دى أطلع له واحدة من تحت
الأرض تلخبط له حياته .. تقلبها رأساً على عقب.. واحدة
هدفها توبخ البحيرة .. بس .. هو كده.. وهنا بقى .. يبدأ
الصراع ..

(يجلس ويمسك الورقة ويبدأ فى التخطيط
السريع).

ويمكن أخليها قصة منفصلة .. طب النقاط الأساسية
قبل ما تطير من دماغى ..

(يكتب ثم يجرى إلى المطبخ فيحضّر إبريق
الشاي الذى يغلى ويصب الشاي ويضع فيه
السكر).

أه .. الصراع! بين هناء الزواج اللى بتمثله المرأة وبين

الحرية الحقيقية اللى ربنا عطاها لكل إنسان.. حرية
الخلق والإبداع.. بين ههنا..

(يرفع كوب الشاي إلى فمه ولكنه ينزعج كأنما
لسعته عقرب ويضعه ثانياً).

ايه ده؟ أحمر شفايف؟ مش معقول.. (يتأمل الكوب
جيداً) أحمر شفايف مافيهاش كلام.. لكن دانا غاسل
الكبايات وماسحهم ومنشفهم بنفسى!! (ينظر إلى الكوب
ثانياً بتفحص) وخاصة الكوباية دى! البيت فيه عفاريت!!

(يجلس منهارة على الكرسي ويضع رأسه بين
يديه ويحاول ان يلم شتات نفسه).

أحاول افكر من تانى.. ايه يا حنفى اللى حصل
امبارح بالضبط؟! جم الجماعة واتغدوا.. قالوا إنهم
وصلوا من مصر تعبانيين وعابزين يستريحوا.. خلّيتهم
يستريحوا هنا فى الصالة ومايهوبوش ناحية أوض البيت
الثانية.. صبح! ماهم كانوا عابزين يشمشموا هنا وهناك ..
عابزين يعرفوا بالضبط أنا عابش أراى وباعمل ايه!! ناس
حشريين... ويعدّين؟! آه .. ويعدّين شربوا الشاي وعلى
الساعة ثمانية كانوا فى المحطة واتوكلوا جميعاً... والحمد
لله.. ماحدث جه ناحية البيت من ساعتها والنهارده
الجمعة اجازة حاصصه للكتابة.. (يسمع أصواتاً
غريبة من غرفة النوم).

ايه ده؟ ايه الصوت ده؟ دا مش عفريت... دا حرامى !!

(يلتقط سكين ففتح خطابات ويتلصص
ويسترق الخطى بجوار الحائط عندما يفتح
باب غرفة النوم وتدخل هناء - فى الاربعين -
فى قميص نوم).

(يشهق شهقة كبيرة لمراها).

هناء : صباح الخير .. (تتأعب) ..

حنفى : (يظل مهيوّتا وفاتحا فاه دون حركة)

هناء : (تتجول فى الصالة بحرية مزعجة) صباح الخير يا
حنفى باقول .. (تحاول أن تتمطى كأنما لتنفّض عن
نفسها كسل النوم) الواحدة عضها اكسرم الخشب..

حنفى : (مستردا أنفاسه) ممكن أعرف حضرتك مين؟

هناء : (تضحك) ما انتش عارفنى صحيح؟

حنفى : (مترددا) الوش مش غريب على ..

هناء : ياخبر يا حنفى !! معقول تنسى أختك؟

حنفى : (صارخا) أختى ؟

هناء : (ضاحكة) أختك فى الرضاعة !

حنفى : أنا ماليش أخوات لا فى الرضاعة ولا فى أى حاجة..

(محاو لا اتخاذ موقف بالغ الحزم) أنتى مين

بالضبط .. وايه الى جابك هنا وعايضة ايه منى ؟ انطقى !

اتكلمى وإلا..

هناء : والا طلبت البوليس؟ اتفضل اطلبه.. حتلاقي التليفون مقفول عليه فى دولا ب الكتب!

حنفى : كدهه؟

هناء : انت غيرت مطرحه؟

حنفى : يعنى بتتحدثين حضرتك؟

هناء : انا بحاول أساعدك؟

حنفى : تساعدينى على ايه؟ أنا كل اللي عايز أعرفه انتى مين وايه اللي جابك هنا ؟!

هناء : ماقتلك!

حنفى : وأنا قتلتك مالىش اخوات بنات!

هناء : يعنى مصر انك تتحدى؟

حنفى : انا عايز أعرف انتى مين ! (تتحول اللهجة إلى لين) واظن دا من حقى يعنى..

هناء : (تعجبها اللهجة الجديدة) .. كلام معقول..

حنفى : اتفضلى ..

هناء : عايز تعرف اسمى؟

حنفى : اذا كان ممكن.. لو سمحتى !

هناء : اسمى هناء ..

حنفى : هناء ؟

هناء : اللى حصل!

حنفى : وبتقولى انك أختى ؟

هناء : مش مهمة دى ..

حنفى : لا .. مش مهمة ازاي؟ دى أهم حاجة.. لازم أعرف .. أنا راجل ليه سمعتى ومركزى وإذا كنتى أختى صحيح يبقى لازم أعرف ..

هناء : بس عشان السمعة والمركز؟

حنفى : وكمان لازم أعرف ازاي حضرتك - سعادتك - سيادتك - دخلتى بيتى وطلعتى م الأوبه دى ..

هناء : حاضر .. مدام مصمم .. المسألة بسيطة.. أنا قريبتك من بعيد.. تفاصيل القرابة مزعجة وحتاخذ وقت واحنا ماعندناش وقت..

حنفى : (محاو لا الاعتراض) بس أنا -

هناء : (فى لهجة حازمة) أقدر أثبت لك كل حاجة بعدين.. المهم دلوقت أريح بالك من ناحية علاقتنا.. لما الله يرحمه رامنز بك اتوفى بعثت لى أختى تلغراف عشان أحضر عملية توزيع الميراث..(ضاحكة) وأنت عارف اللى فيها بقى..

حنفى : (فى شك) والله مش قوى ياست هناء..

هناء : (برقة) توت توت توت .. بلاش ست هناء أرجوك .. حاول كده تنادينى هناء.. هناء حاف.. (مستمرة) .. لما رامنز بك

أتوفى .. حضرت التوزيع وتنازلت لهم عن نصيبى.. وبعدين
اتفقت معاهم على اننا نيجى كلنا نزورك ونقعد يومين
معاك.. (مغيرة لهجتها) مارضيتش أقول لهم طبعاً إن أنا
قررت أقعد هنا على طول ورائى درست أحوالك وعرفت كل
حاجة عنك من يوم ماسبت مصر..

حنفى : (بسخرية) حضرتك.. سيادتك قررتى تقعدى فى بالضببط
على طول؟

هناء : هنا .. معاك..

حنفى : فى البلد الصغيرة دى ؟! وحتلاقى شقة منين؟

هناء : الاقى شقة يعنى ايه؟ وهى الشقة دى عيبها ايه؟

حنفى : شقتى أنا ؟ دى ؟

هناء : مش بطالة أبدا.. بحرى وغربى - بعيدة شوية عن الـ ..

حنفى : (مقاطعة بحدة) بحرى ايه وغربى ايه؟ عايزة تسكنى معاى
هنا ازاي ؟

هناء : مش دلوقت.. ماتخافش! لما نتجوز..

حنفى : (مصعوقاً) لما ايه؟

هناء : (تضحك) ممكن تهدى أعصابك شوية؟! ممكن نقعد سوا
ونشرب الشاى فى هدوء؟!

حنفى : (منفجراً) أجيب الهدوء منين؟ والله عال! (يضرب كفا
بكف) واحدة تطب على غفلة وتقول قريبتك وبعدين عايزه

أجوزك وعائزاني أشرب الشاي في هدوء!

هناء : أنا قلت عايزه أجوزك ؟

حنفى : لا أنا !

هناء : أنا قلت لما نتجوز ..

حنفى : (ساخرا) أه .. قولى كده ..

هناء : فى الحقيقة بقى .. كان لازم اقول لما انت تتجوزنى !

حنفى : (ساخرا) طبعاً طبعاً .. الفرق كبير خالص !

هناء : الفرق مش كبير مادام بنحب بعض .. (فى رقة) أرجوك

افهمنى يا حنفى .. بلاش نظرات الاستغراب دى .. دلوقت

تعرف قد ايه أنا بحبك لما تسمع حكايتى .. وحتعرف قد ايه

انت بتحبينى لما تسمعنى حكايتك ..

حنفى : كلام جميل .. ممكن بقى -

(طرق شديد على الباب)

(يبدو على حنفى الاضطراب الشديد

ولكن هناء تشير إلى المطبخ بنقطة)

هناء : طالع له القرايز يا حنفى ..

حنفى : (مرتبكة) القرايز ؟ ! قرايز ايه؟

هناء : قرايز الكوكا كولا طبعاً .. أهم قدامك ورا الباب ..

حنفى : (فى ذهول) .. مين .. مين؟

هناء : مش سامعنى .. دا عم عبده البواب .. انت نسيت؟ النهارده الجمعة ! !

حنفى : (يفيق قليلا) ا .. صحيح .. طيب ممكن انتى ..
(يشير إليها أن تختبئ)

هناء : ماتخافش .. مش حيشوفنى .. (تدخل غرفة النوم)..
(يخرج حنفى الزجاجات ويعود)

حنفى : الله ! هى راحت فىن ؟ هناء .. هناء ..
(تخرج وقد ارتدت ثوبا أكثر حشمة)

انتى رحتى فىن ؟ آ خارجة ؟

هناء : (تضحك) خارجة ايه ؟ .. كنت بغير بس .. مش معقول فوزى يشوفنى بقميص النوم..

حنفى : وايه اللى يخليه يشوفك ؟

هناء : هو موش فوزى جأى الوقت ؟ !

حنفى : وعازاه يشوفك ليه ؟

هناء : اسمع يا حنفى .. فيه حاجات كتير لازم نتفق عليها أولا لازم نغير السرير الصغير اللى فى أودة النوم ده.. أنا ضهرى كان حينكسر من خشب الأرضية..

(تلمح بوابر ثورة عليه فتحاول تهدئته)

خليك معاى لحظة .. طبعاً مش معقول عايزنى أنام ع الأرض .. ومش ممكن انت ترضى تنام ع الأرض وتسبب

لى السرير .. يعنى بجد ليلة امبارح كات ايلة يعلم بيها
ربنا ..
حنفى : قصدك/ تقولى/ انك/ كنتى/ بايته/ فى نفس الاوده معاى
ليلة امبارح ؟
هناء : والله ان ماكنتش مصدق ..
حنفى : والله انا ماشفتكيش ولا حسيت بيكى ولا -
هناء : حتشوفنى ازاي وانت اول مادخلت غطيت نفسك باللحاف
من فوق لتحت .. ورحت غاطس فى النوم -
حنفى : يانهار اسود ومهيب ..
هناء : اسود ليه كفى الله الشر؟ .. دى حاجة طبيعية جدا ..
حنفى : انتى بتتكلمى جد؟ عايزه تقولى انك كنتى نايمه فعلا معاى
وماحسيتش بيكى؟!
هناء : تفتكر ان ده ذنبى؟!
حنفى : احنا فى ذنبى وذنوبك؟ مستحيل اللى بتقوليه ده ..
هناء : ده اول .. ثانيا بقى احنا ماعندناش وقت ولازم ننتهى من كل
التفاصيل قبل ما يوصل فوزى ..
حنفى : (مغيرا لهجته كمن اعتزم امرا جادا) اسمعى ياهناء ..
اذا كنتى عايزه فلوس انا تحت امرك .. اى حاجة .. عايزه
كام؟
هناء : (تضحك) انا .. عايزه فلوس؟! اهى دى نكتة الموسم ..
حنفى : انا باتكلم جد ..

هناء : مش ممكن.. مستحيل تكون اتغيرت للدرجة دى..

حنفى : عايزه قد ايه؟

هناء : يا حنفى انا بحبك..

حنفى : مفهوم.. مفهوم!!

هناء : وعايظه اتجوزك.. وعندى فلوس تكفيننا طول العمر.. فلوس

أكثر من كل اللي مر عليك فى البنك.. ومن كل اللي حلمت

بيه فى البنك..

حنفى : آ.. قولى كده.. عايزه تشترينى بالفلوس!! هو ده السبب فى

لهجة الثقة الغريبة اللي بتتكلمى بيها.. لهجة التحدى

والوقاحة..

هناء : (صارخة) أنا ما اسمحكش..

حنفى : (صارخا) آمال تسميها ايه؟ لا يافندم أنا ما بعشى نفسى

بالفلوس.. وعمري ما بعث نفسى بالفلوس .. يمكن تكونى

عارفه أصدقائى ويمكن كمان تفاصيل حياتى .. لكن أؤكد

لك أن فيه حاجات كتير ماتعرفيهاش عنى ومش ممكن

تعرفيها .. أنا ياهانم سبت حياة حافلة فى مصر .. حياة

كان ممكن أتمرغ فيها فى الفلوس وفضلت أعيش هنا من

أجل رسالة سامية .. من أجل هدف عظيم ..

هناء : بحيرة اليأس ؟

حنفى : هربا من بحيرة اليأس ! أنا ما اعرفش عنك حاجة.. وموش

عايز اعرف حاجة .. كفاية انك امرأة .. ويبدو ان معاكى

فلوس كمان.. يعنى الشر بعينه.. الشيطان اللي أنا هربت

منه.. (مغيرا لهجته إلى سخرية) كلامك عن الحب كان
ممكن يهزنى لو كنت صغير أو مغمض .. والحقيقة برضه
انك جميلة وجذابة وعندك جرأة طول عمرى باحلم بيها ..
لكن - فات الألوان ياهانم .. أنا كبرت واتعلمت.. وموش
ممكن ارجع للضعف بتاع زمان ..

هناء : (تصفق له) .. برافو .. برافو

حنفى : اتريقى على كيفك .. بس تأكدى ان اللى هربت منه موش
ممكن ارجع له ..

هناء : لسه بتحبتها يا حنفى .. (فى ألم حقيقى) يا حبيبى..

حنفى : بحبها؟

هناء : (فى رقة) تعالى جنبى ..

حنفى : بحب مين ؟!

هناء : سناء ..

حنفى : انتى .. انتى .. بتقولى ايه ؟

هناء : اهى دى الوحيدة اللى كان ممكن تفرقنا ..

حنفى : انتى بتقولى الغاز..

هناء : أنا عارفه بقول ايه.. وانت عارف أنا باقول ايه.. اللى أنت
ماتعرفوش بقى هو ان انا عشت معاك قصتك.. وقصة
هرويك.. وقصة رسوك على شط البحيرة..

حنفى : أنا هربت من البحيرة ..

هناء : ورسيت عليها !! اللي انت تصوريته قارب نجاة.. قارب
يوصل للشط التاني.. كان في الحقيقة قارب انتحار.. قارب
متثبت ع الشط .. مربوط بحبل متين رغم وجوده في المية ..
لما تحس انه بيتهز اوعى تتصور انه بيتحرك. دا بيعلى ويوطى
بس مع موج الشط..

حنفى : مش فاهم حاجة أبداً ..

هناء : مافيش داعى للخداع أكثر من كده ..

حنفى : صدقيني أنا مش باخدعك..

هناء : عارفه انك مش بتخدعنى.. انت خدعت نفسك سنين وسنين
لحد ماصدقت الخدعة..

حنفى : أنا عمرى ماخدعت نفسى..

هناء : (تضحك) ممكن يا حبيبي تشرب الشاي بقى؟

حنفى : مش عايز شاي ولا زفت ..

هناء : يمكن أعصابك مش حتهدى إلا اذا طمنتك وقلت لك أنا
ماشية .. أنا حامشى .. وموش خارج أبدا ..

حنفى : (متريدا) ما أقصدش يا هناء ..

هناء : معلش.. دا رد فعل طبيعى ..

حنفى : (قابضاً على كوب الشاي) أنا قصدى ..

هناء : لكن قبل ما امشى لازم أقول لك ليه أنا حبيتك وحافضل
أحبك على طول..

(صمت)

لما حنفى عبد الباسط كان طفل صغير.. كانت عنده أحلام جميلة.. حياته فى الواقع كانت حلم طويل.. بالليل كان يحلم أحلامنا العادية وبالنهار كان يحلم وهو ماشى.. وهو فى المدرسة.. وهو راجع م المدرسة.. التلامذة كلهم يرجعوا البيت الساعة أربعة وهو يرجع - عارف الساعة كام؟!

حنفى : (يلين قليلا) أصل السكة كانت طويلة ..

هناء : لا .. سكته هو بس!! كان يأخذ السكة الزراعية رايح جاي لحد الشمس ماتغيب ويعددين يروح.. ولما كبر ودخل الجامعة ماكانش يقدر ينام قبل الفجر.. القراية بالنسبة له كانت تأليف.. كل كلمة يقرأها كانت عالم كبير.. عالم يشترك هو فى خلقه ..

حنفى : كلية التجارة كتبها كبيرة ..

هناء : برضه لا ! ماكانش يسهر يقرأ الكتب المقررة.. كان يقرأ أى حاجة إلا المقرر..

حنفى : وكان بينجح برضه ؟

هناء : كان بينجح .. ما اعرفش ازاي! المهم ان الحلم الطويل ده بقى أكبر منه .. وكان لازم يتقل عليه ..

حنفى : يتقل عليه ازاي؟

هناء : (تضحك) ما اعرفش ..

حنفى : أنا عارف عايضة تقولى ايه بالضبط.. كلنا لنا أحلام وكلنا بنصدم بالواقع ..

هناء : لكن هو بقى ما قدرش يشوف الواقع أبدا .. أنا حاسا أنك
سؤال بسيط جدا .. تقدر تقوللى فين سناء دلوقت؟
حنفى : ما اعرفش ..
هناء : لا تعرف ..
حنفى : قلتك ما اعرفش .. أرجوكى يا هناء .. صدقيني بقى ..
هناء : انت موش ملاحظ انى شبه سناء ؟
حنفى : إطلاقا !
هناء : (بدلال) بدمتك!
حنفى : (بتأملها جيدا) مافيش اى شبه!
هناء : (بدلال) طب وعشان خاطر؟
حنفى : يمكن فى الطول والـ .. القوام يعنى .. لكن الوش لا لا لا ..
هناء : طب وإذا قلتك إنى سناء ؟
حنفى : (صارخا) انا عارف انتى عايزه ايه ! عايزه تدمرى السعادة
اللى انا عايش فيها .. عايزه تنتقمى من قصة حب قديمة
راحت وطواها الزمن ..
هناء : حلوة طواها الزمن ..
حنفى : ايوه طواها الزمن .. خلصت .. خلاص ..
هناء : يعنى خرجت من حياتك للأبد ؟!
حنفى : للأبد .. وأبد الأبدى كمان .. خلاص ..
(يدور حول نفسه مفكرا)

انتى ايه اللى عرفك الكلام ده؟! انتى شخصية فى منتهى
الغراية! بقى كنتى عايزانى لسه افضل عايش قصة حب بقى
لها سنين وسنين..؟! ويعددين حب ايه ده اللى كان بينا ؟! دى
كانت عايزانى أرسى على شط البحيرة.. ماكاتشى بتحبنى
قد ماكانت عايزة تتجوزنى ..

هناء : وجواباتها ؟

حنفى : آ .. (متعلثما) آ .. جواباتها كانت جميلة.. جواباتنا احنا
الأتنين فى الحقيقة..

هناء : جواباتك انت كانت حزينة.. كانت بترسم صورة غريبة
لواحدة مالهاش وجود.. واحدة انت رسمتها وألفتها وقررت
انها لازم تخرج من حياتك..

حنفى : موش أنا اللى قررت ..

هناء : المشكلة يا حنفى انك عمرك ما كنت بتترد على جواباتها
بالمعنى المفهوم.. كنت فى كل جواب تقول كلام جميل
مايوصلش إلا لنتيجة واحدة.. لنهاية حزينة.. كان كلام
جميل لكن جماله فى حزنه.. فى شاعريته فى عدم ارتباطه
بالواقع!! وعدم ارتباطه باى عاطفة.. ياخسارة .. ضاعت
سناء وضاع معاها الحب ..

حنفى : كان حب جميل ..

هناء : بالنسبة لك طبعاً كان جميل .. وجماله انه كان لازم ينتهى
لأنك قررت من الأول انه ينتهى.. وعشان كده أصريت انك
تعمل علاقة مع سناء خيالية مرتبطة بحلم مستحيل..

حنفى : سناء كانت نفسها مستحيلة ..

هناء : بالعكس .. سناء كانت بنت عادية جدا .. زى كده ..

حنفى : (يضحك) إلا زيك دى .. انتى طلعتلى مين ؟!

هناء : حبها كان جرىء وقوى .. لو كنت قبلته .. لو كنت واجهته
على الأقل .. يمكن كنت قدرت تبعد عن شط اليأس .. شط
الاستقرار اللي أنت عايش فيه هنا .. تتفاخر بالعزلة
وأحلامك الخداعة .. يعنى باختصار الشاب اللي كان بيقرأ
وغاوى تجارة .. اللي كان عايز يعمل مصنع خوص ..
مصنع برانيط يشغل فيه البنات بقرش للبرنيطة وقرشين
للسبت .. اللي عايز يبيض الخوص بالكفور .. نفس الشاب
ده خلق واحدة مالهاش وجود اسمها سناء .. وقرر بينه وبين
نفسه انه يحبها حب يائس .. زى حلمه اليائس..

حنفى : (يصفق) برافو ! خلصتى خطبتك ؟

هناء : (فى حزن) خلاص .. سلامو عليكم ..

حنفى : على فين ؟

هناء : أروح مطرح ماجيت .. ياخسارة .. كان عندى أمل .. أمل
صغير أنك تشوف الحقيقة .. وتعرف ان كل شىء انتهى من
يوم ماسبت البنك .. من يوم ماقررت تستقيل وتهرب ..
وتشتغل بالتدريس .. باى باى ..

حنفى : (منزعجا) انتى رايحه فين .. اشتتى ..

هناء : مافيش فايده ياحنفى ..

حنفى : انا عندى اهداف ثانية .. اقعدى بس وانا احدى لك .. انا
ماعدتش بالحلم بمصنع خوص ولا حاجة .. اسمعى بس ..
انا بقيت اديب!

هناء : (تضحك) بجد ؟! ده اجمل خبر سمعته في حياتى .. بس
يعنى موش لازم الأديب يكتب ؟!

حنفى : طبعا .. مانا ..

هناء : ما انت ايه ؟ من امتى كنت كاتب ولاتعرف تكتب ؟ من امتى
احترفت الأدب ؟ انت بقالك سنين عايش فى البلد دى
وبتحلم .. بتحلم باى حاجة .. موضوع الحلم بيتغير لكن
الحلم واحد .. تمام زى حلم أيام الدراسة .. وحلم أيام
البنك .. الزمن بالنسبة لك بقى لعبة كبيرة .. الأيام بتمر يوم
ورا يوم وانت قاعد تخطط وتحلم .. وتخلق فى شخصيات
مالهاش وجود .. زى فوزى ..

حنفى : فوزى مالوش وجود ؟

هناء : (تضحك) نفس الحكاية يا حنفى .. فوزى الحقيقى حاجة
وفوزى اللى فى خيالك حاجة ثانية خالص ..

حنفى : دلوقت بييجى وتشوفيه ..

هناء : (تضحك) بييجى امتى يا حنفى ؟! انت عارف كويس قوى ان
فوزى مش جاى ..

حنفى : ازاي بقى ؟

هناء : فوزى اللى حييجى بعد - (تنظر إلى الساعة) بعد - عشر

دقايق كاتب بسيط في المدرسة .. إنسان غلبان مالوش في
الدنيا إلا الشغل والبيت ..
حنفى : حرام عليكى ياهناء ..
هناء : أما فوزى صديقك اللى انت خلقتة فدا حاجة تانية خالص ..
راجل أديب وذواقة ومؤلف كبير..
(يطرق الباب بشدة)
حنفى : أهه وصل !
هناء : دى الجرايد .. (تضحك) خدها من تحت الباب وانت ساكت..
(يسحب الصحف ويتأمل فيها)
سيبها دلوقت .. أنا ماعدش وقت ولازم أمشى ..
حنفى : طب بس تكمل الحكاية ..
هناء : حكاية أيه .. ؟
حنفى : انت رايحة على فين ؟
هناء : ودا يهكم فى إيه ؟!
حنفى : يعنى مستعجلة ليه ؟
هناء : يا حبيبى يا حنفى .. عايزنى أقعد معاك شوية ؟ مش خايف
أم سميرة تشوفنى والا تسمعنى؟
حنفى : أم سميرة دخلها أيه ؟
هناء : دخلها أيه ازاي بقى ؟ هى مش بتيجى بعد الصلا ؟

حنفى : (محرجا) النهارده .. أصله ..
هنا : (تضحك) معلش .. ده ضعف بشرى محتوم..
حنفى : خلقتها دى كمان؟
هنا : لا .. انت يوم ماتخلت عن سناء ..
حنفى : (صارخا) يادى سناء .. هو مافيش عندك غير سناء ؟
هنا : (فى رقة) فيه .. فيه كتير ..
حنفى : ولا أنا كلى ضعف وخيبة كده .. ازاي حبيتينى؟
هنا : أنا ماقولتش انت خيبة .. بالعكس ..
حنفى : بعد كل ده ومش خيبة ؟
هنا : فيه أخيب منك ..
حنفى : (ساخرا) بجد ؟
هنا : أنا ..
حنفى : انتى ؟ دانتى أجراً وأذكى واحدة شفتها فى حياتى ..
هنا : شفت بقى ازاي .. لازم تخلق من هنا اللى قدامك هنا ثانية
مالهاش وجود ..
حنفى : أنا عمرى ما حسيت فى حياتى بالضعف اللى شعرت بيه
النهارده..
هنا : بالضعف بتقول ؟
حنفى : الضعف البشرى اللى قررت ألفيه من حياتى إلى الأبد ..
كلامك عن سناء مش صحيح..

هناء : حنفى !

حنفى : ومع ذلك فيه نعمة صدق .. نعمة عشت سنين عشان اسمعها
ولازم اعترف انها هزيتنى هن .. انتى بتقولى انى حبيت
صورة سناء .. صورة خلقتها وتمسكت بيها ولما تعارضت
مع الواقع .. (يضرب يدا بيد) خلاص .. اللى انت
ما تعرفيهوش بقى .. واللى أنا نفسى ما عرفتش إلا دلوقت ..
هو انى عمرى ما حبيت سناء -

هناء : صورتها -

حنفى : لا الأصل ولا الصورة .. أنا حبيت نفسى فيها .. حبيت
الطاقة الكبيرة اللى اتهاىلى انها حتفجرها فى أعماقى .. ولما
هربت .. لما غيرت مجرى حياتى كلها ما كنتش بهرب من
سناء .. ما كنتش باتخلى عنها زى ما انتى فاكرة .. أنا كنت
باهرب من الخدعة الكبيرة اللى عشت فيها سنين ..

هناء : ودخلت فى خدعة تانية .. مالهش نهاية المرة دى ..

حنفى : بالعكس ..

هناء : قادر تشوف نهايتها ..

حنفى : انتى مش قادرة تشوفها؟

هناء : أنا شايقة ساحل ممتد وأمواج وقارب مربوط ..

حنفى : مبقاش مربوط خلاص ..

هناء : نزل بحيرة اليأس ..

حنفى : بحيرة الأمل..

هناء : رجعنا للخداع..

حنفى : مش ممكن يبقى فيه خداع معاكى.. انتى امرأة نادرة.. ممكن تكونى أختى فى الرضاعة صحيح؟

هناء : ممكن ؟

حنفى : ممكن.. لكن مش محتمل!

هناء : عشان فارق السن؟

حنفى : ما أقصدش..

هناء : عشان تقدر تتجوزنى ؟

حنفى : (يضحك) ياريت !

هناء : وممكن أكون قريبك من بعيد زى مابقول؟

حنفى : وممكن ماتكونيش قريبتى خالص.. مش مهم.. مش مهم..
مش مهم أبدا.. المهم أن انا لقيتك..

هناء : أنا اللى لقيتك ..

حنفى : المهم إن الماضى الطويل بدأ يتزحزح زى الكابوس من على
نفسى .. بدأت أحس أنى أقدر أتنفس من جديد .. لأول مرة
ياهناء باشوف وباشوف قدامى المرأة المثالية ..

هناء : اللى قدرت تفهمك ؟

حنفى : اللى فاهمه كل حاجة ..

هناء : وانت فاهمها ..

حنفى : طبعاً ..

هناء : انت عارف أنا مين صحيح ؟

حنفى : أنا بحبك ياهناء ..

هناء : بتحبنى أنا ؟ والا بتحب حنفى اللى أنا صورته ؟!

حنفى : بحبك طبعاً .. انتى ربنا بعثك عشان تنقذينى من بحيرة

اليأس .. أنا حاسس انى لو اتجوزتك .. لو رضيتى تقفى

جنبى وتحبينى زى ما بحبك حاقدر أحقق كل مشروعاتى ..

حاقدر انطلق وأوصل لآخر أفاق البحر..

هناء : وتسبب البحيرة لمن ؟!

حنفى : مش مهم بقى ..

هناء : يعنى عايز ترجع للبنك ؟

حنفى : (منزعجاً) ليه ؟

هناء : انت مش بتقول -

حنفى : أنا جيت سيرة البنك ؟

هناء : انت مش عايز -

حنفى : أنا عندي مشروعات خطيرة .. غير مشروع الخوص

والبرائيط .. أنا عندي مشروعات تانية خالص ..

هناء : غريب الإنسان وغريب ذهن الإنسان .. يبقى شايف

الحقيقة.. شايف الواقع وحاسس بيه ومصمم انه يتجاهل

وجوده ..

(صمت)

أدى احنا أه .. شايفنى قدامك .. واحدة بتقول لك
ياحبيبى ويتذكر أحلام الماضى ويتبص للمستقبل .. واحدة
مصرة انها تقف جنبك وتتمنى تعيش معاك وتحبك .. ومع
ذلك لا يمكن تحاول تعرف أى شىء عنها .. وتصر على
مشروعاتك الخيالية - المشروعات (تضحك) اللى حتفضل
زى سناء وزى الكتابة وزى حياتك كلها .. حلم كبير ..
حنفى : يا هناء الواقع لازم يتبنى على حلم .. من غير حلم ما
نقدرش نغير الواقع ..
هناء : ومن غير واقع حتفضل أحلامنا أوهام زى طواحين الهوا
اللى حاربها دون كيشوت .. افنكر معاى .. انت لما كنت بتعلم
بالمصنع كان فيه خوص فى البلد .. كان فيه بنات مش لاقين
شغل .. كان ممكن البنات تاخذ قرش وقرشين .. كان فيه
كلور ..
حنفى : كل حاجة موجودة ..
هناء : طبعا .. بس لا بالكميات المناسبة ولا بالتكاليف اللى نقدر
عليها .. الحلم كان أصله واقع اتحول إلى ذكرى .. إلى
ماضى جميل .. والماضى مش ممكن يعمل مستقبل ..
حنفى : أنا مش ممكن اتخلي عن -
هناء : طبعا .. لأن ده قانون شط البحيرة ..
حنفى : أنا أبعد ما أكون عن البحيرة .. وبعدين ماتنسيش انتى
دلوقت واقفة جنبى .. بحبك وبتحيينى ..
هناء : مرة واحدة كدة !؟

حنفى : هءاء... حببىتى..قصدك ايه؟

هءاء : الحب شىء رائع بس ممكن ياترى ينزل علينا م السما كده
زى المن والسلوى؟!

حنفى : (منفعلا) انا حاسس بيه .. بيهزنى هز من جوه..

هءاء : اللى هزتك هى نعمة الصندوق..

حنفى : لا ..

هءاء : انت لسه قايل كده دلوقت..

حنفى : لكن انا بحبك.. انا حاسس انك عارفانى اكتر ما اعرف
نفسى.. انك عشتى معاى طول العمر..

هءاء : (تضحك) مش كله يعنى..

حنفى : اناحاسس انك طالعه من جواى.. عايشه جواى.. مفاجاتك
لى كانت اكبر منى..

هءاء : عشان لخبطت لك نظريتك..

حنفى : بالعكس.. نظرية البحيرة صح مية فى المية.. وبعدين انتى ما
قلتيش اى حاجة انا مااعرفهاش..

هءاء : (فجأة) ممكن اكون خيال يا حنفى؟

حنفى : افندم؟

هءاء : ممكن اكون شخصية انت الفتها؟

حنفى : (يضحك) لا لا لا.. كله إلا دى.. (يقترب منها) دانتي
حقيقة.. واقع.. لحم ودم.. وحاجة اكسرا كمان!
(يحاول الإمساك بها وتراوغه وتفلت منه -
ويزداد حماسة وهو يردد)
واقع ممتاز.. حقيقة من لحم ودم!
هناء : (فى دلال) حنفى.. وبعدين ..
حنفى : هناء.. أرجوكى..
هناء : أبعد عنى..
حنفى : عايز أقول لك حاجة..
هناء : حاجة ايه..
حنفى : كلمة فى ودك
هناء : دمك ثقيل..
حنفى : مش ممكن تفلتى منى..
(يدق الباب بعنف فيتسمر فى مكانه).
مين ده؟
هناء : حيكون مين؟ فوزى طبعاً.. افتح له..
(تجرى إلى غرفة النوم.. تخرج)
حنفى : لحظة واحدة..
(يفتح الباب.. يدخل فوزى)

أهلا يا فوزى.. اتفضل.. أهلا أهلا.. جيت فى وقتك..
أما عندي حنة مفاجأة لك..

(فوزى لا يرد - فقط يسير مندهشا)

اتفضل.. تعالى.. تتصور اني رجعت أحب تانى زى
المراهقين! واحدة قريبتى من بعيد.. بتقول انها اختى فى
الرضاعة.. بتهزر طبعاً.. أما حنة بنت ياد.. استنى لحظة
وانت تشوفها.. (مناديا) هناء.. هناء.. (إلى فوزى) حاجة
ما حصلتش.. جمال ومال وجراة وذكاء.. (مناديا) هناء
هناء.. تعالى ما تكسفيش.. دا فوزى صاحبى.. (إلى
فوزى) أقعد يا فوزى.. اتفضل.. حتلاحظ ان فيه كباية
شأى زيادة عليها أحمر شفايف (يضحك) كبايتها..

فوزى : (لا يرى شيئاً) فين؟

حنفى : أميه قدامك.. (ينظر بعينيه بحثاً - لا يرى شيئاً) لازم
غسلتها.. لازم (يتردد).. راحت فين.. (مناديا) هناء.. هناء..

فوزى : انت شارب حاجة ع الصبح؟

حنفى : شارب ايه؟ دلوقت حتشوف

(يهرع إلى غرفة النوم يفتحها وينظر داخلها

فى قلق)

هناء.. هناء.. انتى رحتي فين؟ الله.. هناء.. هناء..

فوزى : (متصفا الأوراق على المنضدة) هى هناء دى مش بطة
القصة بتاعتك؟

حنفى : (مذعورا) قصة ايه يا أخى.. هناء دى حبيبتي.. هناء..
هناء.. مش ممكن تكون خرجت.. دى كانت لسه معاى
دلوقت..

فوزى : خرجت منين..

حنفى : ما اعرفش..

فوزى : وبخلت ازاي؟

حنفى : ما اعرفش..

فوزى : انت رجعت للتأليف تانى؟!

حنفى : (منهارا) تأليف ايه يا أخى.. (فى صوت باك) والله
العظيم كات هنا دلوقت.. بقى لى ساعة باتكلم معاها..

فوزى : مفهوم.. مفهوم..

حنفى : مفهوم ايه انت كمان.. انت فاكرنى مجنون..

فوزى : أبدا.. بس يالله وحياتك عشان نخلص الحلقة.. البطل بتاعنا
كان عنده إيمان كامل بحرية الرجل وإصرار على عدم
السماح للمرأة بتدمير حياته وإلقائه على شط بحيرة اليأس..

حنفى : (فى انهيار تام) ولذلك قرر الا يرتبط بامرأة ما طول
عمره.. إذ أن المرأة هى التى تستطيع وحدها أن تبعده عن
شط بحيرة اليأس.. وأن تضعه فى قارب الأمل..

فوزى : ازاي بس؟! دا عكس الـ -

حنفى : وفضل أن يحيا بعيدا عن الحياة.. قانعا بما يصوره له خياله

من لحظات النعيم.. لحظات يتصور فيها أنه وجد ضالّة عمره
وهو (فجأة) فوزى..

فوزى : أفندم..

حنفى : انت فاكّر نفسك أديب؟

فوزى : وبعدين بقى؟

حنفى : انت كاتب غلبان وكحيان فى المدرسة..

فوزى : أنا زعلتك فى حاجة؟

حنفى : أبدا.. بس حبيت أقول لك.. لازم نواجه الحقيقة بقى ولو مرة
واحدة..

فوزى : وحضرتك؟!

حنفى : أنا؟ أه.. أنا لا أديب ولا لى فى العملية دى خالص.. من
امتى كنت كاتب؟ من امتى احترفت الادب؟..

فوزى : يعنى مش حنكمل الحلقة؟

حنفى : لا.. ازاي.. يالله بينا.. وان ماكناش حنكتب.. حنعمل ايه؟

فوزى : «لحظات يتصور فيها أنه وجد ضالّة عمره».. كنت بتقول

حنفى : (صارخاً).. ومع ذلك.. هناك كانت هنا دلوقت!

بلحمها ودمها!!

(ستار سريع)



الصديقتان

● **المنظر:** صالون فاخر فى منزل حديث بعض الأجهزة الموسيقية واللوحات التى تدل على الذوق الرفيع. فى المنتصف كرسى ضخم ولير إلى اليمين باب الشقة. فى الخلف شرفة تطل على النيل. إلى اليسار باب يؤدى إلى ردهة واسعة تظهر من خلالها ابواب الغرف الأخرى.

● **الزمن:** الحاضر

● **الشخصيات:** هدى فى الأربعين

سوزى نفس العمر

عندما ترتفع الستار تكون سوزى نائمة فى المقعد الوثير فى منتصف الغرفة وعلى وجهها منديل حريرى. تبدو كمن استغرق حقا فى الأحلام ثم فجأة يرق جرس المنبه على المنضدة المجاورة فتدفع المنديل وتفرك عينيها وتوقف الجرس. تنمطى. تنظر فى المنبه ثانيا وتغفر فمها دهشة. تعدل من هدامها وشعرها. تخرج امرأة صغيرة من حقيبة يدها وتصلح من زينتها. ثم تتجول فى الغرفة تعدل بعض الأشياء وهى تتطلع إلى الساعة من لحظة إلى أخرى. تخرج ورقة من درج فى المنضدة وتتأملها وتفكر. يرق جرس الشقة.

(يرن جرس الشقة)

سوزى : اتفضل! ادخل.. الباب مفتوح!

(يرن الجرس ثانيا)

اتفضل! اتفضل!

(يفتح الباب بهدوء وتدخل هدى - لحظات

توتر كأنما تدرس كل واحدة منهما صاحبته

لترى حقيقة ما بها)

حضرتك؟

هدى : هدى موسى.. الدكتورة هدى موسى..

سوزى : (فى تردد) حضرتك اللى (تشير إلى الورقة).

هدى : أبوه يا سوزى.. أنا اللى بيعت الكارت.

سوزى : (فى حيرة شديدة) أنا تصورت.. انه..

هدى : عارفة عارفة! ماتأخذنيش.. أصلى اتغيرت كثير خالص..

يمكن حضرتك نسيتيني زى مانسيتي ناس كثير.. لكن أنا

مانسيتش وعمرى ما حانسى..

سوزى : حضرتك كنتى معاى فى المدرسة؟

هدى : بلاش حضررتى وحضرتك أرجوكى.. أنا عارفة انى بالكلم

نجمة السينما والمسرح الشهيرة سوزى حافظ.. لكن احنا

زمايل وحبايب من أيام ما كانت توحيدة بسطويسى !

سوزى : (تضحك) البسطويس ! بالالف واللام!

هدى : لحاد سنة رابعة!

سوزى : (تعود للحيرة) بس انا موش فاكرة - قصدى ..

هدى : افكر حضرتك .. وع العموم سواء افكرتى أو ما افكرتيش
دا موش مهم .. لان الموضوع اللى أنا جاية عشانه موش
عايز زكريات طويلة .. هى حاجة واحدة بس .. وباختصار
انا جاية أستأذنك قبل ما احرمك من أعز حاجة فى حياتك ..

سوزى : (تتذكر بصعوبة) انتى كنتى فى قسم النقد ؟ (صائحة فجأة)
هدى! هدى! ماكانش اسمك هدى ! (فى سعادة حقيقية) كان
اسمك هادئة ! والاهادية ؟ (تضحك فى فرح طاغ) وكنتى
هادية وهادئة كمان! مش معقول مش معقول ! ازيك ياهدى !
يابنت الإيه ! ازاي خسييتى بالشكل ده ! واحلويتى !
وصغرتى... صغرتى خالص ! عملتى عملية ؟ احكى لى ...
تعالى يا هدى تعالى .. ادينى حضن ألف بوسه .. معقولة
دى ! طب والله ماعرفتك خالص .. ياخرابى ياخواتى !

(تنهض إليها وتحضنها بلهفة وشوق)

حقيقى وتجرحها من ذراعها إلى مقدمة المسرح

وتهمس لها.

انتى لازم تحكىلى على كل حاجة .. لازم احجزك هنا لحد
ما اطلع منك كل أسرارك .. كل مغامراتك .. وشقاوتك ..
ياهادية .. يامية من تحت تين !

هدى : (فى سعادة ولكن بلهجة جادة) أنا ياسوزى وفرت
نفسى للحب الحقيقى .. أنا .. ماخبيش عليكى موش
قادره اصدق انك افكرتيني صحيح .. كنت واثقة انك
نسييتنى .. وموش بس نسييتنى

سوزى : تعالى هنا ياخبرصه تعالى .. ايه حكاية الدكتور هدى
دى؟ خدتى دكتوراه صحيح ؟ فى النقد برضه ؟

هدى : حاجيك كل حاجة فى وقتها .. بس اسمحى لى الاول
اقول لك أنا ايه اللى جابنى النهارده .. ايه اللى عايزه
استأذنتك فيه..

سوزى : ودى عايزه اسباب! جيتى وخلص .. قولى انى وحشتك ..
أه ياغفرتيه .. كام سنه ؟ خمستاشر ؟ ستاشر ؟

هدى : أنا جاية عشان استأذنتك فى أجمل حاجة فى حياتك ..
أحرمك من أعز شىء تمتلكيه ..

سوزى : كده كده ! أأمرى !

هدى : أنا عايزه جوزك ..

سوزى : عايزه ايه ؟

هدى : عايزه جوزك - الراجل اللى انتى خطفتيه من بين ايدينا
كلنا من بين ايدينا أنا بالذات .. بعد ما عشنا أجمل قصة
حب فى الوجود ..

(صمت متوتر - تتبادل المراتان نظرات عدم
فهم وتحاول سوزى ان تركز بصرها عليها
بينما تتحاشى هدى التركيز على وجه سوزى)
أنا كان ممكن اتصل بيه من بره بره .. كان ممكن اتصل
بيه فى الشغل مثلا .. أو فى النادي .. كان ممكن أخده
ونهرب.. لكن ضميرى ماسمحليش .. انتى صاحبتى على
أى حال والصدقة لها أحكام ..

(صمت)

أرجوكى ياسوزى ماتزعليش منى .. حاولى تفهمينى أنا
صحيح باعتبار أن ده حقى .. أملى .. حياتى .. الهدف اللى
كافحت علشانته عشرين سنة .. لكن .. بجد .. لازم أتأكد أنك
راضية ومقتنعة بموقفى كل الاقتناع وبصراحة اذا ماقدرتش
أقنحك .. يبقى مش حاخده !

سوزى : (تصفق بيديها) عزت ! عزت ! عزت !

هدى : أرجوكى ..

سوزى : (تنادى) عزت ! عزت ! عزت !

هدى : أرجوكى اسمعيني ..

سوزى : (فى حماس أكبر) عزت ! عزت ! عزت !

هدى : أرجوكى .. المسألة مش مزار .. (صارخة) أنا باواجه
أصعب موقف فى حياتى .. الموقف اللى انتظرته عشرين
سنة !

(يدخل خادم عجوز)

سوزى : انت رحت فين يا عزت ؟ هات لى ميه اخذ بيها الدوا وشوف
الدكتورة تشرب ايه ..
(صمت)

هدى : مرسى ..

سوزى : اعمل لنا شاي .. بسرعة .. هات المية الاول... فاهم ؟!

(يخرج)

هدى : ياسوزى يا حبيبتي أنا موش عايزاكى تفهمينى غلط .. أنا
صحيح فى وضع يسمح لى بالانتقام .. لكن تاكدى انه
ما فيش فى قلبى اى حقد أو كراهية .. اى واحدة فى مكانى
كان ممكن تكون دواقعها .. زى ما بنقول .. سوداء ! انتقام
وانتصار زائف حقير .. لكن لا .. مش أنا ما فيش فى
قلبى إلا الحب .. والحب الأبيض الطاهر النقى البرىء ..
نفس العاطفة اللى حركتنى ورسمت لى طريقى وأنا فى
المعهد .. خلينى أحدد لك بالضبط أنا شاعرة بآيه .
ابراهيم كان بالنسبة لى حلم .. شاب وسيم وذكى ومتدفق ..
أفكاره لاتنتهى .. وكلامه تيار لايتوقف من الصور
والتأملات .. حبيته زى ما حبه البنات عشت معاه بالنهار فى
المعهد وبالليل (فى لهجة منشد الاشعار) زى ما بيقول
الشاعر .. كنت بعيش مع صورته .. مع قلبه الكبير .. حياتى
كانت ابراهيم .. روحى كانت معاه .. وحفضل معاه ..

(صمت)

وهو ده الحب ياسوزى اللي خلاتنى أحاول أوصل له ..
بأى الطرق .. كنت عارفه أنه موش ممكن يحبنى أياميها ..

سوزى : اشمعنى ...

هدى : كنت تافهة وفقيرة ..

سوزى : ودا يمنع ؟

هدى : ماكنتش جديرة بيه.

سوزى : بلوقت خدتى الدكتوراه وبقيتى عروسة لقطة ؟!

هدى : أرجوكى ماتزعليش منى .. أنا موش جاية اتحدى .. أنا
جاية بحق الصداقة ..

سوزى : بس انتى ضامنة أنه حيسيبنى ويجرى وراكى على طول
قصدى أول مايشوفك حيطب ساكت !

هدى : بالعكس ياسوزى .. المسألة لها جذور طويلة .. وجذورها
من أيام المعهد .. كل واحد فينا أياميها كان بيحاول يعمل
حاجة من نفسه .. من ذاته .. حاجة ينور بيها الطريق
للناس..

سوزى : (ساخرة) شمعة تحترق ؟

هدى : بالضبط .. ودا اللي حسيته تمام .. فى يوم موش ممكن
انساه .. إبراهيم كان بيحرق ذاته عشان حاجة أكبر من
التمثيل والكتابة .. أكبر م السيناريو والنقد والهيصه دى

كلها .. عشان الإنسان .. الإنسان الغامض الغريب ..
اللغز.. فتحت له قلبي .. استجاب !

سوزى : على طول طبعاً؟

هدى : قصدك ايه ؟

سوزى : يعنى .. كويس انه استجاب!

هدى : ابراهيم انجذب الى .. حس بانى مخلصه .. وعاشقة
بالأمل.. والإصرار .. والصراحة .. وكل اللي بيخلى الإنسان
إنسان ..

سوزى : واعترف لك ..

هدى : أبدا...

سوزى : ياخسارة ...

هدى : ماكانش فيه داعى .. عينينا كانت بتتكلم .. قلوبنا كانت
بتدق .. لما كنت أشوفه داخل المعهد .. شايل كتاب الوردريس
نيكول.. ومسحة حزن على جبينه.. والا وهو خارج م
الحاضرة .. لسه فاتح القلم والكشكول زى مايكون بلع
المعلومات بلع .. قلبى كان بيتحول لحة من شمس الصبح ..
ساعات ماكانش بيبص لى خالص .. لكن كنت عارفه .

(يدخل عزت بصينية عليها ماء وشاى
وحيوب)

سوزى : (صارخة) هى دى الحبيب برضه؟ انا عايزة الحبيب
الزرقا .. فاهم؟ يالله جييها بسرعة .. اتفضل (الى
هدى) الشاى يا هدى .. يا حبيبتي .. اتفضلى اشربيه سخن
يروق دمك .. اتفضلى ..

(يجرعان الشاى)

هدى : (صمت ثم تهب فجأة) وبعدين فجأة .. وبدون سابق
إنذار.. خطفتيه منى .. مديتى ايدك .. وبكل ثقة وجراءة ..
اتجوزتية .. كان صعب حد ينافسك موش ممكن .. مين يقدر
ينافس نجمة الإغراء .. بطلة أنجح روايات المسرح
والسينما .. والقاسم المشترك لكل مسلسلات التلفزيون؟

(فى انهيار) وبصرامة .. فأتت على أيام فقدت فيها
الأمل.. تصورت ان المعركة انتهت من قبل حتى ماتبدأ
تصورت ان القضية خسرانة .. وانه فعلا ما فيش أمل .. لحد
مايوم رجعتوا فيه من لندن بعد مونتاج أول فيلم تعليميه
بالألوان .. فأكره ؟

سوزى : (تحسسى الشاى ولا ترد)

هدى : (فى رنة فرح طاغ) وصلنى جواب منه .. اعترف لى فيه
بكل حاجة .. كشف لى الحقيقة .. خلانى أفتح عيني
وأشوف الدنيا من جديد .. عطانى أمل .. لسه فأكراه .. كلمة
كلمة وحرف حرف .. عشرين سنة يا هدى ولسه حروفه
بتنور قدام عنيكى - (تحاكي صوت رجل) لم يكن ما بيننا

حلماً .. لم يكن ماعرفناه وهما .. بل الحقيقة نفسها ..
(تعود لصوتها الطبيعي) الحقيقة ياسوزى .. ومن
يومئذ عشت على الأمل ده .. كنت ساعات بالارد على
جواباته .. وساعات ما اردش .. عرفت انه غلط .. مسكين ..
يوم ماتجوزك .. مسكين .. زيه زى اى راجل تانى يواجه
جمالك الصارخ .. جمالك الطاغى الظالم ..

(تدور فى حيرة على المسرح)

عطفت عليه .. أشفقت عليه .. وحببته أكثر ...

سوزى : (تصيح فجأة) عزت .. عزت .. ! انت رحت فىن ؟ كنت
واقف بتتصنت؟

(ينخل عزت بالدواء)

خلصتى الشاى؟! شيل الصينية يالله ! واسمع موش
عايزاك تقف ورا الباب تانى .. فاهم .. خد .. (تعطيه ورقة
مالية) اوصل للاجراخانة جيب لى علبة جديدة نفس
الدوا .. مع السلامة ..

(يخرج)

هدى : أنا متأسفة انى أرعجتك .. أنا عارفة ان عندك روماتيزم ...

سوزى : نقرس ياهدى .. نقرس ..

هدى : كان مكتوب روماتيزم .. ومكتوب ان الدكتور هارسون وصف
لك رمل اسكندرية ثلاث اشهر ..

سوزى : (تضحك) صحيح! اما انت عليكى ذاكرة!

هدى : (تقدم إليها دوسيتها) أبدا.. ولا ذاكرة ولا حاجة.. كل حاجة هنا...

سوزى : كل حاجة يعنى ايه؟

هدى : كل أخبارك.. كل تفاصيل حياتك.. من يوم ما تجوزتوا.. كل حاجة بتتنشر عنك حظيتها فى دوسيه مخصوص.. حتى وأنا فى فرنسا...

سوزى : انتى رحتى فرنسا شخصيا؟!

هدى : (تضحك) شخصيا.. قعدت سنين وسنين.. مصر بالنسبة لى بقت يوم الرجوع.. يوم ما اخلص الدكتوراه وارجع لكم.. لابراهيم.. والسوزى! سبت شغل بييجيب دهب عشان اليوم ده!

سوزى : ولسه راجعه لازم؟!

هدى : يوم السبت اللي فات.. سألت عليكى فى الشركة عطونى عنوانك مارضيتش اجيب سيرة ابراهيم طبعاً.. حيقولوا ايه ! كان لازم اشوفك انتى.. كان لازم أمد لك ايد صداقتنا القديمة وافتح لك قلبى...

سوزى : لكن.. ماتأخذنيش فى دا السؤال ..

هدى : (تضحك) حلوه دى !

سوزى : قصدى يعنى : ماتجوزتنيش طول المدة دى ولا مرة ؟

هدى : يعنى ايه ولا مرة ؟

سوزى : يعنى !! ماتجوزتيش خالص ؟
هدى : (غاضبة) عايزانى اخون حبي لبراهيم .. عايزانى اخون
الامل!
سوزى : (تضحك) لا لا العفو ! تخونى الامل !! تخونى الامل
ازاي؟! لازم الامل هو اللي يخونك!
هدى : قصدك ايه ؟
سوزى : ولا حاجة .. هو بس ابراهيم ببيعتهك جوابات م الزرقا
المكتوبة عالمكتبة؟
هدى : وفيها ايه ؟ كل الناس بتكتب جوابات ع الماكنته!
سوزى : طبعا .. انا بس كنت عايزه اعرف ان كان ساعات بيغير
طبعه ويكتب بخط ايده ..
هدى : فى الاول .. استنى .. معالى الدوسيه..
سوزى : مافيش داعى للدوسيه .. انا حاقولك كان بيقولك ايه ...
هدى : قصدك ايه بالكلام ده ؟
سوزى : ولا حاجة يا هدى .. تعالى جنبى هنا .. تعالى ..
هدى : موش فاهمه قصدك ايه بالغمز واللمز ده ...
سوزى : ولا غمز ولا لمز يا حبيبتي .. انا حاقولك كل حاجة بصراحة
ماعادش فى العمر بقى .. موش حانعيش قد اللي عشناه ...
تعالى بس جنبى وانا احكيك .. (بيدو على وجهها الالم)
النقرس لعنة من لعنات ربنا ..

هدى : انتى موش خدتى الدوا؟

سوزى : مابقاش ينفع فيه دوا ولا هوا !! خلاص ...

هدى : اجيب لك بطانية واللا حاجة ؟

سوزى : لا مغلش .. اسمعيني بس .. أنا على قد إعجابى
بإخلاصك وحماسك ... على قد ما أنا عايزه أسعدك
وماخلش مشوارك يطلع على فاشوش .. حاسه انى لازم
أقولك الحقيقة اذا كانت أعصابك تستحمل ! (تقدم إليها
حبة) تاخذى حبة من دول ؟

هدى : مرسى .. مضطربة) حقيقة ايه؟

سوزى : احنا من يوم ما اتجوزنا يا هدى .. (تضحك ثم تنفعل
يتحول الضحك إلى نشيج) .. حتى فى يوم جوازنا .. الله
يسامحك يا ابراهيم فى يوم جوازنا نفسه .. (تهدىء من
روعها) طول عمره .. ربنا يغفر لنا جميعا .. وهو غاوى
بيعت جوابات ...

هدى : جوابات .. غرامية ؟

سوزى : من كله ياهدهد ! حاقول ايه واعيد ايه ؟ المسألة هى انى
حبيته .. سايرته .. طارعتة .. غفرت له .. شجعتة !

ماكانش ممكن يقدر يعيش من غير جوابات .. من غير
معجبات .. من غير مايحوط نفسه بهالة كبيرة م العظمة
والبهرجة ساحر نساء وفاتن نساء ومحطم قلوب

العدارى! كنت باشتغل بالساعات فى الاستوديو .. ساعات
كنت باقضى الليل كله تحت الأنوار وفى الحر والعرق ..
مخرج بيسرخ ومصور بيبيع .. وأرجع ألقه محوط نفسه
بعشرات المعجبات .. فى الأول - ما انكرش - كنت بازعل
وباتخانق .. ويعدى أنا عارفه انها غلطى .. بدأت أفوت
واقول معلش .. الراجل فنان وعايذ يشوف صورته بتكبر
وتملأ الدنيا من حواليه .. دى كانت النهاية !

(صمت)

هدى : ويعدى !؟

سوزى : مافيش .. يا حبيبتي ياهدى .. خلاص ...

هدى : خلاص ايه ياسوزى ؟! حصل ايه ؟

سوزى : موش عارفه أقول لك ايه تانى ..

هدى : (ثائرة) تقول لى حصل ايه ؟ كل حاجة..

(تتحول فجأة إلى لين واستغراق فى الحلم) من
بعد ما اعترف لى بحبه !! من بعد ما بعث لى أشهر جواب
فى التاريخ ... (تخرج خطاباً من حقيبة يدها) ده حاجة
تانية ياسوزى لانى فى يوم ما استلمته بقيت حاجة تانية ..
ياسوزى موش كل الجوابات .. ولا كل الكلمات ! اتفضلى ..
(تقدم إليها الخطاب لا تبدى سوزى أى اهتمام فيقع
على الأرض وتعيده إلى حقيبة يدها)

سوزى : خليهو لك مادام حيحفظلك الذكريات .. مادام حيخليكى
تعيشى فى الوهم ..

هدى : حينا ماكنش وهم ..

سوزى : (تستأنف القصة بلهجة جد موضوعية) بعد مارجعنا
من لندن كان قدامى اختيار صعب .. اختيار مستحيل !
يا إما حياى العملية والمجد اللى طول عمرى بالحلم بيه ..
يا إما حبى وهنائى العائلى ... ولو كان ده هو الاختيار بس -
على صعوبته - كان هان ! لكن اكتشفت انه ماكانش ممكن
أركن على طريق واتخلى عن الطريق الثانى .. الاثنى كانوا
بيتقاطعوا فى كل لحظة .. (تزفر فى رضى) الحمد لله ...
الكابوس انتهى .. كانت أيام رهيبه !

(فجأة فى حماس والم) كل لحظة كانت بتمثل عبء
تقيل على نفسى كل يوم كنت باشوف ابراهيم اللى عطيته
قلبى وحياتى .. بيخونى مع واحدة ثانية !

هدى : مستحيل ! أنا واثقة إن ده مستحيل !

سوزى : كانت خيانة من نوع خاص بيه هو .. خيانة واحد شابف ان
كيانه بيصغر كل كيان مراته ما كبر .. فاضطر يعوضه فى
مغامرات غرامية .. كان عايز يشوف صورته بتكبر
وخلص .. عايز التليفون يضرب والناس يسألوا عليه ..

(صمت)

هدى : ماكانوا ببسألوا عليه طبيعى .. مش كاتب سيناريو كبير؟!
ابراهيم كان اسمه في كل مكان .. (تدق على الدوسيه)
عندى جميع الإعلانات!

سوزى : (تضحك) المرحلة الثانية ! كان لازم اديله حاجة تعوضه عن
النقص - أو الاحساس بالنقص - اللي كان بياكل فيه أكل !

خليته يشترك فى كتابة السيناريو .. الأول مع ناس ..
وبعدين بقيت أصر ان اسمه يطلع لوحده .. (ضاحكة) طبعا
من غير مايكون حط قلم على ورقة .. كان بيقتعد يحكى
الحدوته اللي المنتج فكر فيها لكاتب الحوار .. ويقول له
ياالله.. اتفضل .. أدى السيناريو ..

هدى : انتى بتزيفى التاريخ .. أنا عندى ريفيوها عن تطوره
السينمائى وتربعه على عرش الكتابة..

سوزى : المرحلة الثالثة ! والنهائية .. كل خطوة خطيتها كبرته
وزيفته.. وبعده عنى .. وعننا كلنا .. كان بدأ يعيش فى
عالم وهمى م المجد يسهر ويشرب ويتكلم ويصرخ .. ويعد
الجوابات الغرامية اللي بتوصله .. ويحكى فى كل جواب
حكاية .. وأنا قلبى يتقطع حنت .. (فى الم حقيقى) لو
ماكنتش ربطت قلبى وحياتى بيه .. ماكنتش اتعذبت العذاب
ده كله .. المرحلة الثالثة كانت أصعب المراحل .. ابراهيم
ماكانش بيفوق أبدا من أحلامه .. وكنت بكل إخلاص أكتب
الجوابات الغرامية وامضيها بنفس الطريقة وابعثها فى

مواعيدها .. واتفق مع كتاب السيناريو والحوار عشان
يحضروا المادة في ميعادها .. وارتب المواعيد مع الصحفيين
عشان ياخدوا رده على أسئلتهم واجمع لهم صور قديمة
له .. وادفع .. ياما دفعت عشان احافظ على صورته اللي
كبرت لها لحد ماكبرت على أكثرم اللازم (فى انهيار) لازم
اعترف انى كنت سبب انهياره.. فى مأساته .. فى النهاية
المؤلة اللي انتهى إليها ..

هدى : (فى تردد ورعب) مأساة ايه؟ قصدك .. ايه ؟

سوزى : هو ده السر اللي نجحت فى المحافظة عليه سنين وسنين!
عارفه .. (الم شديد) كانت أنانية منى .. أنانية ودناءة كمان..
لكن .. ماكانش قدامى غير الطريق ده.. كان لازم احافظ
على سمعتى... على إسمى كممثلة بتحاول تبقى درجة أولى..
(حماس والم) لكن... ربنا وحده يعلم انى كنت بحبه.. لآخر
يوم معاً - لآخر يوم قضاه فى مصر..

هدى : (فى شبه انهيار) آخر ، .. يوم .. ازاي؟ انتى بتقولى ايه؟
(باكية) هو راح فين ؟

سوزى : من كام سنة .. لازم كنتى فى الخارج انتى .. مااعرفش ..
يوم ١٢ مايو.. كان يوم حر بصورة غير طبيعية.. صبحت
الصبح لقيت ورقة منه بيقول فيها انه ماشى.. جريت زى
المجنونة ع الأولد افتشها.. دورت فى كل حته .. اتصلت بكل
اللى اعرفهم.. بكل اللي عارفين السر.. وأخيراً عرفت انه
سافر.. هاجر .. استقر الأول فى استراليا.. ويعدين هونج

كونج.. ويعدين كندا.. ويعدين أمريكا الجنوبية.. ويعدين
انقطعت اخباره تماما عن الجميع..

هدى : دا مستحيل يا حبيبتي يا سوزى (تفتح الدوسية) انا
عندى جوابات منه قريبة.. قصدى .. تاريخها قريب جدا..
ومبعوتة من مصر موش ممكن يكون دا كله كذب يا
سوزى.. مستحيل..

سوزى : (فى ثقة) آخر جواب بعتهولك .. قصدى انا بعتهولك..
كان بتاريخ ١٧/٤ / وكان على عنوان فى مصر الجديدة ..

هدى : على ماما ..

سوزى : لو قرىته كويس حتعرفى انه مافيهوش اى حاجة جديدة لا
عنه ولا عننا .. حتلاقيه رد متوضب بكل عناية على الجواب
اللى انتى بعته تاريخ ٢/٤ !!

هدى : انا ماخدتش بالى من .. (تتردد) لازم يكون معاى هنا..
لحظة واحدة ..

سوزى : أقول لك بيقول ايه ..

هدى : (صارخة) موش ممكن ..

سوزى : الوهم كان لازم يستمر يا هدى يا حبيبتي.. كان لازم الناس
يتصوروا انه لسه موجود .. لأن انا رفضت الاعتراف
بالواقع .. رفضت التسليم بالحقيقة.. ورفضت اعتراف بانه
هجرنى.. بإنه تخلى عنى إلى الأبد! يمكن لو ماكنتش
طاوعته كنت أنقذته من الهوة السحيقة اللى وقع فيها ..

هدى : (ماتزال غير مصدقة) والجوابات اللى قبل كده؟
موش ممكن .. أنا عندي كل مايثبت انه بيحبني ..
وبيحبني أنا لوحدى.. سوزى .. مستحيل!! أنا عشت السنين
دى كلها أحلم باليوم ده..
سوزى : أنا عشت السنين دى كلها فى كابوس .. مش فى حلم..
هدى : انتى اللى خلقتى الكابوس لنفسك..
سوزى : ما انكرش انى اشتكرت فى تدميره ...
هدى : (صارخة) انتى قاتلة !
سوزى : يمكن !

هدى : انتى مجرمة ! انتى دمرتى حياته زى مادمرتى حياتى .. انتى
تستاهلى الشنق... أنا لازم أقتلك .. أخنقك بإيديه دول..
(تهجم عليها فى عنف فلا تجد اى مقاومة بل
وتدع النوسيه وكل ما فيه يقع على الأرض -
بسمة هائلة - فتنهار على الكرسي باكية ..
تلتقطه سوزى ولكن هدى تختطفه من يدها
وتبدا فى تمزيقه)

هدى : هى دى حياتى ؟! (تمزق الخطابات والصور وكل
شئ) هى دى السنين اللى عشتها أذاكر واكتب وابحث
عشان أبقي جديرة بيه ؟! ليه عملتى كده يا سوزى ؟!

سوزى : أنا ؟

هدى : (تبكى) ليه دمرتى حياة إنسان جميل صافى نقى ؟ ليه ليه
ليه ؟

سوزى : يا هدى يا حبيبتي .. أنا عملت كل اللى أقدر عليه.. القدر
ياهدى أكبر مننا احنا الاثنين .. على الأقل انتى عندك
وظيفتك ترجعى لها ..

هدى : فى مصر؟

سوزى : فى مصر والا فرنسا !

هدى : انا كنت راجعة لحاجة واحدة يا سوزى .. واهى ضاعت..

سوزى : الإنسان لازم يستمر .. الحياة أحياناً بتبقى عبء كبير ..
لكن لازم نعيشها ..

هدى : مستحيل .. أنا راجعة فرنسا تانى ..

سوزى : بلاش عبط بقى .. ما انا عايشه أهه..

هدى : مستحيل .. أنا لا يمكن أقعد دقيقة واحدة هنا بعد كده..
والحمد لله انى ماسبتش الشغل .. وعندى حاجة أعيش
منها هناك ..

سوزى : أرجوكى يا هدى .. اعطلى.. خليكى معايا .. أنا محتاجة لك

هدى : لا .. مغلش .. اعذرينى .. (تقف وتحزم أمرها)

أنا الى حد ما سعيدة انى عرفت الحقيقة ..

أنا باقول «وداعاً لحلم كبير .. لكن .. مين عارف .. يمكن
الاقى ابراهيم فى حطة تانيه .. ان ماكانش فى أوروبا يبقى
فى أى حطة تانيه فى أرض الله الواسعة .. باى باى
ياسوزى..

سوزى : هدى حبيبتى .. ارجوكى اسمعنى .. بلاش جنان امال ...
هدى : خلاص ياسوزى .. انا اتخذت قرارى .. اللى حصل حصل
.. ولازم نواجهه .. متشكرة خالص ..

(تقبلها بشغف)

سوزى : (تبكى) هدى .. هدى .. خليكى معاى .. ارجوكى .. انا
محتاجة لك فى وحدتى وعذابى ..

هدى : (باكية) ماقدرش ياسوزى ..

ماقدرش يا حبيبتى .. انا مسافرة الصبح .. بكره بإن
الله الحجز بتاعى موجود وكل حاجة جاهزة ..

سوزى : (تحتضنها) بحق صداقتنا .. خليكى معاى ..

هدى : (تجرى مسرعة) باى باى ياسوزى .. باى باى الى الأبد !

(تخرج)

سوزى : (وحدها) هدى ! (تجفف دموعها ثم تبتسم فى رضى
تجمع الأوراق من أرضية الغرفة وتضعها فى سلة
إلى جانب المنضدة وتصلح من هندامها ثم تدق
الصنج وتنادى)

عزت ! عزت ! (تتردد) والا اقول ابراهيم أحسن ؟

(يدخل الخادم العجوز)

الدكتورة خرجت؟ (يوميء) كويس .. اسمع .. خللى
ابراهيم بيه يتفضل .. (ضاحكة) قول له البر أمان
(ضاحكة) بسرعة !

(عزت يزىل شاربه ويعتدل فى قامته ويخلع
العمامة من على راسه ويفك الجلباب ويلقيه -
جانبا ليبدو شخصا فى حوالى الأربعين
وسىما وجذابا)

(قرمقه) موش بطل! (تشاغلله) معقول كده يا برهوم؟
ايه رأيك ؟ اسمح لى اعترف لك انى مثلت أجمل أدوار
حياتى .. وايه .. اخراج وتمثيل .. السيناريو بتاعك نفع ..
يا حبيبى .. (تحتضنه فى شغف) لكن .. الله يجازيك ..
سيناريو كان حيويينى فى داهية .. فى لحظة حسيت انها
كانت حخنقنى بجد .. دى مجنونة صحيح يا برهوم .. كانت
حخنقنى بحق وحقيق وكنت حنايك ياملك ! (فجأة تهاجمه)
انت ازاي ياد انت تحب واحدة بالشكل ده ؟ ماتنكرشى ..
جواباتك أهم! (تضحك) قطعنها بإيدها ! الحمد لله ..
الكابوس انزاح .. دى كانت ممكن تعمل فضيحة بجلال ..
(تقدم إليه السلة) اتفضل... الدوسيه كله .. خلاص .. (فى
رقة) بس الشطارة بقى يا حلو .. مانرجعش تلعب بديلنا تانى
أبدا .. فاهم يا .. يا .. عزت؟! (تضحك) والا والله .. والله ..
أبعث لها !

(يتعانقان)

« ستار »

الفهرس

٧	الإهداء
٩	السجين والسجان
٤١	الصديقان
٧٧	البحيرة
١٠٩	الصديقتان

مطابع الهيئة المصرية العامة للكتاب

رقم الإيداع بدار الكتب ١٩٩٤/٤٢٦٠

ISBN 977- 01- 3774 -x